

## MAKI

*Yoni tau'abiye bapitaiso yana guguya  
(Madiu 3:1-12; Luke 3:1-9, 15-17; Yoni 1:19-28)*

<sup>1</sup> Teina wasa namwanamwana Besinana Yeisu  
vehabana, iya Yaubada Natuna, wasana ana  
abavetuwni.

<sup>2</sup> Mwalona tauwalo mahalava Aisaya Yeisu  
wasana vehabana ileleya'o, neta Yaubada yana  
walo iwalo mahalavaena'o, iwalo:

‘Teina yagu tausagenawasa yavetamale mugaiyei  
na vehabam yam amwaha isepa,

<sup>3</sup> na balabala awawai alinana mwala'ina ainaena  
iwalo mahalava na iwalowalo,

“Yada Bada yana amwaha amsepa yo  
am'abiye dumwalu”.

<sup>4</sup> Yoni tau'abiye bapitaiso imahalava balabala  
awawai ta iguguya tomowa aidiyai, iwalo, ‘Yami  
mumuga yababadi aidiyena amnuwabui na am-  
bapitaiso ta ebe Yaubada yami mumugaone in-  
uwahamuidi’.

<sup>5</sup> Na tomowa maudoidi tupwa Yudeya ainaena  
yo hinage dalava Yelusalem ainaena hiho'eyama  
Yoni yana guguya habi benaleina, ta yadi mu-  
muga yababadi hiwalo mahalavaedi ta i'abiye  
bapitaisowedi bwahi Yolidani ainai.

<sup>6</sup> Yoni ana ale'one lagulagu kameli wiyawiyana  
na ana tulituline kameli 'wapina, na anane bilolo  
yo mwagagau bada.

<sup>7</sup> Na Yoni iguguya ta iwalo, 'Iya dagelaguwena ilalaoma imwala'i gabaegau, na nigele howahowana aenai yapwagogo na aena ana huma yalivahi.

<sup>8</sup> Yau we'ahaena teina ya'abiye bapitaisogomiu, na iya Alu'aluwa Ve'ahihiyena howola abo i'abiye bapitaisogomiu.'

*Yeisu ana abiye bapitaiso  
(Madiu 3:13-17; Luke 3:21-22)*

<sup>9</sup> Hauga tenem ainai Yeisu dalava Nasaleti ilau-gabaei, neta tupwa Galili ainaena, ta ilalaomane bwahi Yolidani ainai, ta Yoni Yeisu i'abiye bapitaiso.

<sup>10</sup> Na Yeisu bada bwahiyena igayogayo tao-hanima na i'itamayahi ta galewa i'ita ilotaho'e na Alu'aluwa Ve'ahihhi ana ita dova gabubu i'aituluma ainai.

<sup>11</sup> Na hinage ehebo alina galewaena iwalo, 'Owa natugu moiha vehabam yayaliyaya mwala'ina'.

*Tomodulele Yeisu itowoi  
(Madiu 4:1-11; Luke 4:1-13)*

<sup>12</sup> Ainaena Yaubada Alu'aluwana Yeisu ivetamalei ta ilau balabala awawai,

<sup>13</sup> ta ahubena 40 tenem ainai imiyamiya, na hauganane aidiyai Tomodulele itowotowoi, nuwanuwana Yeisu i'abiye be'u, na tupwanane ainai lagulagu manimaninidi hinage himiyamiya, na tausagenawasao Yeisu hi'ita'ita avivini.

*Tauyama hitau vehopali Yeisu iyogaedi  
(Madiu 4:12-22; Luke 4:14-15; 5:1-11)*

<sup>14</sup> Hauganane ainai Wasawasa Helodi iloina ta Yoni vada paipaiyai himwauluwei. Himwau i'ovi na mulitai Yeisu imahalava Galili ta wasa namwanamwana Yaubada ainaena iguguyaei,

<sup>15</sup> iwalo, ‘Hauga bada imahalavama'o ta Yaubada ebe ivetauloina alidai. Ainaena yami paihowa yababadi aidiyena amnuwabui na wasa namwanamwana amyemidiyei.’

<sup>16</sup> Ehebo hauga Yeisu Galili le'awanai ivasavasane ta tauyamao hitau bwau matahina i'itadi Galili ni'uwai yadi vinaya hiyahuyahuwei, hiya Saimoni yo Andulu. <sup>17</sup> Ta Yeisu iyogaedima iwalo, ‘Amulitaegau na tomowa am'onadi’.

<sup>18</sup> Eeta yadi vinayawa hilaugabaei na Yeisu himumulitaeine.

<sup>19</sup> Ivasanelau tupwana ta Yemesa yo Yoni hiya Sebedi natunao i'itadi, yadi vinaya hi'abi'abinonovaidi,

<sup>20</sup> ta iyogaedima eena tamadiwa mayana tau-paihowao hilaugabaidi wagai na Yeisu himumulitaeine.

*Yeisu ehebo towaho ainaena alu'aluwa yaba-bana ivai vehulu  
(Luke 4:31-37)*

<sup>21</sup> Mulitai hilaoma dalava yehana Kapeneum ainai, ta Tapwalolowai Yeisu vada tapwalolo ainai iluwu ta ive'ita.

<sup>22</sup> Na tomowa maudoidi nuwadi ipwanopwano yana ve'ita vehabana, ta hiwalo, ‘Ve'ita teina moihana na wahiwahiyalana, ita hesi yada loina ana tauve'itao yadi ve'ita itapiya.’

<sup>23</sup> Na vada tapwalolone ainai ehebo tomowa imiyamiya na towahonane holanai alu'aluwa

yababana imiyamiya, eeta towahonane Yeisu ainai ilohagali,

<sup>24</sup> iwalo, ‘Yeisu, owa towaho Nasaleti hava wuwuna ulalaomane alimaiyai? Nuwanuwam ta ebeha umutugai awa? Na owa hesi bada yahanapuigo’o owa ta’i Yaubada Natuna.’

<sup>25</sup> Ta Yeisu iloinaei iwalo, ‘Ulaumwau, na towahone neta ainaena umahalava’.

<sup>26</sup> Eeta alu’aluwa yababanawa towahone i’abiye tai ta ibatubatutuli na ilohagali mwala’ina, na multai towahowa ainaena imamahalavane.

<sup>27</sup> Na tomowa maudoidi hinuwapwanopwano, na hibom hipanivilauyowedi hiwalo, ‘Ve’ita vauvauna teina vedova? Teina towahone howahowana alu’aluwa yababadi iloinaedi na hi’awa abiyei.’

<sup>28</sup> Hauganane ainai Yeisu wasana hiywasesei Galili tupwanao maudoidi aidiyai.

*Yeisu tauovala bahudi i’abiye namwanamwadi  
(Madiu 8:14-17; Luke 4:38-41)*

<sup>29</sup> I’ovi na Yeisu vada tapwalolo ainaena imahalava, ta Yemesa na Yoni baidanao hilalaune Saimoni yo Andulu yadi vadai.

<sup>30</sup> Na Saimoni lawana ilovala, tauna hi’ala’alawowoli, eeta Yeisu hiwalo auli tauovalane vehabana.

<sup>31</sup> Ta Yeisu iluwu ainai, nimanai i’abi ta i’abiye towolo, eena ana lovala itatalune. Na waihiunane imahalava ta adi i’atububuine.

<sup>32</sup> Lavilaviyena mahana bada ihuhugu ta tomowaone yadi tauovalao yo hiya alu’aluwa yababadi aidiyena hilovalane maudoidi hilauvaidima Yeisu ainai,

**33** yo hinage dalava ana taumiyao maudoidi hilaugogoima ta vadanane mehenaena hitowotowolo.

**34** Na tauovalao bahudi yo hiya alu'aluwa yababadi i'abiye yauyauledi maudoidi Yeisu i'abiye namwanamwadi, na ebe alu'aluwa yababadi iheusilidi himahalava mata i'auhidi na havena hiwalowalo mahalavaei, wuwuna iya bada hihanapuiya'o.

*Yeisu Galili tupwanane ainai iguguya  
(Luke 4:42-44)*

**35** Malatomtom iu'iuna Yeisu itowolo ta vadaena imahalava ta ibom ilau balabala awawai, ta i'awa'awanoi Yaubada ainai.

**36** Na Saimoni ma'ana geluwo hinage himahalava ta Yeisu hibehabehaei,

**37** ta hilobai na ainai hiwalo, ‘Bodaowa nuwanuwadi owa’.

**38** Ta Yeisu iwalo, ‘Talau tupwana hinage dalava aidiyai yo yaguguya. Teina vehabana yalalao-mane.’

**39** Eeta Galili tupwana maudoina hita'i'iliyei ta yadi vada tapwalolo aidiyai iguguya na hinage alu'aluwa yababadi tomowao aidiyena iheusili mahalavaedi.

*Yeisu taulepelo ehebo i'abiye namwanamwa*

**40** Taulepelo ehebo Yeisu ainai ilaoma, ta ipwago na i'awanoi iwalo, ‘Ebe yam nuwatuwu dova howahowana yo u'abiye namwanamwagau’.

**41** Eeta Yeisu i'atemuyamuyaei, ta nimanaena towahonane 'wapinai i'abi ta iwalo, ‘Ehe ausala, unamwanamwa!’

**42** Ta towahonane ana lepelo isawali mwayamwayau, ta inamwanamwauyone.

**43** Na Yeisu towahonane walo yaiyaina imohei,

**44** iwalo, ‘Ee, ulau, na havena yaiya ainai uwalowalo mahalavaegau, na hesi udumwalu ulau taupwaoli ainai yo i'itago, ta ebe yam velau umwauwi Yaubada ainai, hava dova ada loina Mosese ainaena, eeta tomowa hihanapuigo ebeha bada uvauvauyo'o’.

**45** Ta taulepelowa nigele Yeisu yana loina iyamultaei, na hesi tomowa bagibagilidi aidiyai iwalo mahamahalava, na boda mwala'ina hiloma. Teina vehabana Yeisu nigele howahowana imahalava dalavanane ainai, eeta ilau balabala awawai ta nemai imiyamiya, na tomowa dalava bagibagilidi aidiyena hilalaune ainai.

## 2

*Yeisu towaho peupeuna i'abiye namwanamwa  
(Madiu 9:1-8; Luke 5:17-26)*

**1** Ahubena tupwadi hi'ovi'o na Yeisu iwuwyone Kapaneum ainai, na wasana hibenalena'o ebeha Yeisu bada iwuyoma'o.

**2** Ta boda mwala'ina vada holanai yo hinage maseleyai himiya ahaiyama, ta Yeisu iguguya aidiyai.

**3** Na towaho peupeuna ehebo hilawenama na ana tau'avalione hitau vehopali hipageiyama,

**4** na hitowoi yo ebeha peupeunane iluwuwei Yeisu ainai na nigele howahowadi, wuwuna boda imwala'i alili, eeta hi'avalaihini vada ewanai na ana atovi hivai vehuludi ta ainaena peupeunawa

ma'aba'enona hivehonai aituluwei Yeisu mehenai himwamwauwine.

<sup>5</sup> Himwauwi na Yeisu bada towatowahowone yadi yemidi ihanapuiya'o ta peupeunawa iwalo ainai, 'Natugu, yam mumuga yababadi adi nuwahamu bada ulobaiya'o'.

<sup>6</sup> Na tupwadi loina ana tauve'itao Yeisu vahalinai himiyamiya yana walo hibenalei ta hibom atediyai hinuwanuwatuwu,

<sup>7</sup> 'Yeisu teina vedova ta Yaubada ainai iwalo hinahinali? Wuwuna nigele teya howahowana yo tomowa yadi mumuga yababadi inuwahamuidi, na hesi Yaubada ibom howahowana.'

<sup>8</sup> Na hesi Yeisu holanai bada yadi nuwatuwu ihanapuiya'o, ta iwalo, 'Hava vehabana neta dova amnuwanuwatuwune?

<sup>9</sup> Mata vedova teina peupeunane vehabana yawalone, "Yam mumuga yababadi bada yanuwahamuidi'o", bo yawalo, "Utowolo na yam aba'eno u'avalai ta ulau?"

<sup>10</sup> Na mata amhanapui ebeha yau Tomowa Moihagu mayagu loina bale'uwai na tomowa yadi mumuga yababadi yanuwanuwahamuidi.'

<sup>11</sup> Eeta peupeunane ainai iwalo, 'Yau teina yawalowalone, utowolo, yam aba'eno u'avalai ta ulau yam dalavai'.

<sup>12</sup> Eeta itowolo yo yana aba'eno i'avalai ta bodaowa mehediyyena imamahalavane. Tenem ainai boda maudoidi nuwadi ipwanopwano na Yaubada hino'owei, hiwalo, 'Paihowa teina abanuwapwanopwano. Wau mai ehebo ta'i'itane.'

*Yeisu Livai iyogaei  
(Madiu 9:9-13; Luke 5:27-32)*

<sup>13</sup> Multai Yeisu imahalavauyo Galili le'awai, ta hinage boda hitau'ahaiyama ta iveve'itane aidiyai.

<sup>14</sup> Na yana ve'ita ive'ovi ta ilaulau na ehebo takesi ana tauvai i'i'itane takesi abapaihowa vadana ainai imiyamiya. Towahonane yehana Livai, na tamanane Alipiyosi. Ta Yeisu iwalo, 'Livai, umulitaegau!' Eeta Livaiwa itowolo na Yeisu imumulitaeine.

<sup>15</sup> Eena Yeisu mayana taumulitao hilaoma Livai yana vadai habi ai, na boda Yeisu himulitaei, hiya tauyababa dova takesi ana tauvaiwo, yo tupwadi tauyababa hinage, na maudoidi Yeisu mayana taumulitao baidadiyao himiyamiya.

<sup>16</sup> Haugana himiyamiya Palisi yadi loina adi tauve'itao hi'i'itane, ta Yeisu ana taumulitaone aidiyai hipanivila, hiwalo, 'Hava vehabana yami tauve'itane takesi adi tauvai yo hinage yababayabadi tupwadi baidanao hi'ai'ai toyawane?'

<sup>17</sup> Na Yeisu walone teina ibenaledi ta iwawalone, 'Hiya ausaladi taulaumulamula nigele nuwadi, na tauovala hesi nuwanuwadi taulaumulamula. Yau yalaoma nigele ebeha taunamwanamwa a'ava vehabadi, na hesi tauyababao yahaguidi.'

*Yeisu yana walo ai'ai ana ve'ahihi vehabana  
(Madiu 9:14-17; Luke 5:33-39)*

<sup>18</sup> Ta Yoni tau'abiye bipitaiso ana taumulitao yo hinage Palisiwo ai'ai ainaena hive'ahihi yadi tapwalolo vehabana, eeta tupwadi tomowa Yeisu

ainai hilaoma na hiwalo, ‘Yoni ana taumulitao yo hinage Palisiwo adi taumulitao hive'ahihi ai'ai aidiyena, na vedova ta am taumulitaone nigele hiyave'ahihine?’

<sup>19</sup> Eeta Yeisu walo vegevegediyena aidiyai iwalo, ‘Vedova, ilowoinanei yo tawahola ana tauvinunuwo hive'ahihi ebe tautawahola towahona baidadi himiyamiya? Nigele ta'i! Wuwuna iya baidadi ta maudoidi hiyaliyaliyaya.

<sup>20</sup> Na hesi amnuwatuwu avivini ebeha hauga ilalaoma yo tautawahola ana alehao hivaivehulu mata hinuwayababa yo hive'ahihi ai'ai aidiyena.’

<sup>21</sup> Ta ehebo hinage walo vegevegedi imohedi, iwalo, ‘Nigele howahowana yo ale'o vauvauna tupwatupwana luwuluwu miyamiyana ta'aibadi'auhi mata dova ta itavapulipulihi mwala'ina.

<sup>22</sup> Na hinage nigele howahowana waini vauvauna tahiwai 'wapi abahiwa miyamiyana aidiyai, mata dova ilotapulihi yo waini na abahiwa tayepaipaihedi, na hesi tahiwai abahiwa vauvaudi aidiyai.’

*Yeisu Tapwalolo ana tauloina  
(Madiu 12:1-8; Luke 6:1-5)*

<sup>23</sup> Tapwalolowai Yeisu mayana taumulitao tanovi holanaena hilaulau ta ana taumulitaone witi patuna hipupudi ta hi'ai'aidi.

<sup>24</sup> Na Palisiwone hi'i'itadine ta Yeisu ainai hiwalo, ‘Taubada, vedova ta am taumulitao Tapwalolo ana loina hihoh'eho'ene?’

<sup>25</sup> Na Yeisu aidiyai iwalo, ‘Buki Ve'ahihi ainai hilelelene Deividia vehabana na ebe amvahili

amhanapui ebeha iya ma'ana geluwo hivahali mwala'ina.

<sup>26</sup> Ta Yaubada yana vadai iluwu ta beledi ve'ahihi ivai ta hi'a'aine. Beledinane ana loina ebeha taupwaoli a'ava adi talam ta hi'ai. Na bada ta'i hivahali alili, eeta taupwaoli mwala'ina yehana Abayada italamwei ta hi'a'aine.'

<sup>27</sup> Yeisu hinage iwawalo aulidine, iwalo, 'Yaubada Tapwalolo imohegita yada namwanamwa vehabana, nigele ebeha ita ipaihowagita Tapwalolo vehabana.

<sup>28</sup> Eeta yau Tomowa Moihagu, Tapwalolo ana tauloina.'

### 3

#### *Towaho nima giyogiyona*

(*Madiu 12:9-14; Luke 6:6-11*)

<sup>1</sup> Mulitai Yeisu iwuyoma vada tapwalolo ainai ta nemai ehebo towaho nimana giyogiyona ilolobaine.

<sup>2</sup> Na Palisiwone Yeisu hi'ita'ita sipwai na ebe towahonane i'abiye namwanamwa Tapwalolowai mata hive'ewai.

<sup>3</sup> Ta Yeisu towahonane ainai iwalo, 'Utowolo ta uhaema'. Na towahonane itowolo ta ihahaene.

<sup>4</sup> Na Yeisu babadaone iwalo aulidine iwalo, 'Teina yagu panivila alimiyai, aiteya paihowa namwanamwana alidai? Tapwalolo ainai tomowa tahaguidi bo ta'abiye yababadi? Tahaguidi bo tayemwalowoidi?' Ta yana walone nigele hiyayemaiha.

<sup>5</sup> Ta Yeisu mayana modo'ini ivinunu gwaigwaipile aidiyai, yo mayana nuwayababa yadi ulu'uluyaiyai vehabana, ta towahonane ainai

iwalo, ‘Nimam utuwu’, ta towahone nimana ituwu ta inanamwanamwane.

<sup>6</sup> Ainaena Palisiwone himahalava ta Helodi yana bodao baidadiyao hi'ulewahi vedova na ebe Yeisu hi'oiye mwalowoi.

### *Boda Galili le'awanai*

<sup>7</sup> Ainaena Yeisu itauvehuludi ta mayana taumulitao hidobi Galili le'awanai, na boda mwala'ina himumulitaeine.

<sup>8</sup> Bodawone teina Yeisu wasanane hibenalei ta Galiliyena yo Yudeyaena yo Yelusalemaena yo Idumeya tupwanaena yo Yolidani hali tupwanaena na tupwadi dalavaone Taya yo Saidoni vahalidiyena hitatau'ahaiyamane.

<sup>9-10</sup> Ta Yeisu tauovalao i'abiye namwanamwadi, na hesi tauovalao bagibagilidi hinoinoini habi abisawahina, eeta Yeisu ana taumulitaone aidiyai iwalo, ‘Waga vehabagu amvaiyama ta ebe tomowaone besiwa hinoinoinigaune yagelu wagai’.

<sup>11</sup> Na tomowaone aidiyai alu'aluwa yababadi hiluwu'o, ebe Yeisu hi'ita, hibe'u pwagogo mehenai na hiwuiwui, hiwalo, ‘Owa Yaubada Natuna’.

<sup>12</sup> Na Yeisu ilaugagayowedi, iwalo, ‘Havena amwalowalo mahalava ebeha yau Yaubada Natuna’.

### *Yeisu hitau 12 ivesinuwaidi (Madiu 10:1-4; Luke 6:12-16)*

<sup>13</sup> Mulitai malapo'ewana ainai ihae ta ana tau-mulitaone ivesinuwaidi iyogaedi ta hihahaene ainai.

<sup>14</sup> Ta aidiyai iwalo, ‘Omii am tau12 yavesinuwaigomiu na baidaguwao tamiyamiya,

yo multai abo yavetamalegomiu tupwana dalava  
aidiyai, amguguya,

<sup>15</sup> na wahiyalaena alu'aluwa yababadi tomowa  
aidiyena amheusili mahalavaedi'.

<sup>16</sup> Na yehadiyao teina: Saimoni (iya hinage  
hiyogayogaei Pita);

<sup>17</sup> na hinage Yemesa matahina Yoni, hiya  
Sebedi natunao, na Yeisu iyogaedi yehadi Tutu  
natunao;

<sup>18</sup> na hinage Andulu yo Pilipi yo Batolomiu yo  
Madiu yo Tomasi yo vali Yemesa, iya Alipiyosi  
natuna, yo Tadiusa yo vali Saimoni, iya tau'awa  
pa'ipa'i'i mwala'ina Isileli yana miyawahi Loma  
ainaena vehabana,

<sup>19</sup> na hinage Yudasa Isakaliyota, iya howola  
mata Yeisu ihuhulaei.

### *Yeisu na Tomodulele*

(*Madiu 12:22-32; Luke 11:14-23; 12:10*)

<sup>20</sup> Multai Yeisu iwuyo yana dalavai, na boda  
imwala'i alili hitau'ahaiyama, ta nigele howa-  
howana Yeisu mayana taumulitao hi'aiyawasi yo  
hi'ai.

<sup>21</sup> Na yana huhuwone hibenalena'o ebeha Yeisu  
nigele iya'aiyawasi towoi, ta hilau habi lau-  
vaiyama, wuwuna hinuwatuwui hiwalo, 'Bada  
iyauyaule'o'.

<sup>22</sup> Na loinana tauve'itao tupwadi bada  
Yelusalemaena hidobima ta Yeisu yana paihowa  
mwala'ina hi'itaya'o ta hiwalo, 'Towaho teina  
yana paihowa ana ita dova alawaiwone yadi  
taubada, neta Tomodulele yana wahiyalaena  
alu'aluwa yababadi iheuheusilidi'.

**23** Na Yeisu tomowaone iyogaedima ta aba'ita aidiyena ive'ita aidiyai, ipanivila, iwalo, 'Nigele howahowana Tomodulele ebeha iya ana bodaq aidiyai ive'aleha'.

**24** Na hinage iwalo, 'Ebe teya abaloina ainai tomowaone hiwahei na hibom hilo'alehauyowedi mata abaloinane itapiya yo ibe'u.

**25** Hinage dova ebe huhu ehebo na hiwahei yo hibom hilo'alehauyowedi mata hitapiya yo yadi miya iyababa.

**26** Tomodulele hinage dova ebe mayana bodaq hibom hilo'alehauyowedi mata yana abaloinane ibe'u yo i'ovi ta'i.

**27** 'Aba'ita hinage towaho wahiwahiyalana, neta Tomodulele yana vada, nigele howahowana ehebo yaiya iluwu tauwahiyalane yana vadai yo yana tobwatobwa i'aluhewaidi. Na hesi ebe ehebo towaho gulawa ainaena tauwahiyalane nimanane yo aenane ipai mugaiyedi na mulitai howahowana iluwu yana vadai yo yana tobwatobwa i'aluhewaidi.

**28** 'Eeta teina yawalo ili'ilimani alimiayi ebeha tomowa yadi pwanoliwo yo yadi walo yababana maudoina Yaubada mata inuwahamuidi,

**29** na hesi ebe yaiya Alu'aluwa Ve'ahihi i'awa yababaei, Yaubada nigele howahowana inuwahamui, na mumuga yababanane ainai mata imiya vateyai'.

**30** Teina Yeisu yana walo wuwuna tomowa hiwalowalo ebeha ana tauhaguwede neta Tomodulele.

*Yeisu hinana yo tahinao ainai hilalaune  
(Madiu 12:46-50; Luke 8:19-21)*

<sup>31</sup> Yeisu hinana na tahinao hilaoma ta maseleyai hitowolo, na walo a'ava hivetamalei vadai ta ebeha Yeisu imahalavama aidiyai.

<sup>32</sup> Na tomowaone Yeisu vahalinai himimiyane hiwalo auli, 'Taubada, hinam yo tahimwao maseleyai na ebeha nuwanuwadi owa'.

<sup>33</sup> Na Yeisu aidiyai iwalo, 'Yaiyadiwo yede hiya tahiguwao yo hinagune?'

<sup>34</sup> Na hiya vahalinai himimiyane ivinuvinunuidi na iwalo, 'Teina hiya hinagu yo tahiguwao.'

<sup>35</sup> Ebe yaiyadiwo Yaubada yana nuwatuwu himulimulitaei hiya tahiguwao yo nuhuguwao yo hinage hinaguwao.'

## 4

*Walovegevegedi patu vehabana  
(Madiu 13:1-9; Luke 8:4-8)*

<sup>1</sup> Multai hinage Yeisu iwuyoma Galili le'awanai habi guguya na boda mwala'ina hitau'ahaiyama ainai, eeta ehebo waga i'ava'avai ainai igelu ta imimiyane na bodaone le'awai hitowotowolo. <sup>2</sup> Na Yeisu walovegevegedi bahudi aidiyena ive'ita tomowa aidiyai na iwalo,

<sup>3</sup> 'Ambenalei! Taupaihowa ehebo yana tanoviyai ilau ta holanai patu ivevehuludine,

<sup>4</sup> na tupwana patuwone amwahai hibe'u, eeta lowolowo hi'itadi ta hi'aitulu hi'a'aidine.

<sup>5</sup> Tupwadi hibe'u toputopu malagaigaimana ainai ta hi'ini mwayamwayau, wuwuna toputopu habuluna bada,

**6** na mahana i'alahidi ta hiwelai wuwuna patune lamlamdine nigele toputopune gwagwamanane hiyalobai.

**7** Na tupwana haihaili womawomalidi aidiyai hibe'u ta hi'ini mwalomwalowoi, ta nigele howahowana yo hi'aino, wuwuna haihaili womawomalidi hiwahiyala ta hipaiye mwalowoidine.

**8** Eena tupwadi patu toputopu namwanamwana ainai hibebe'une, na hi'ini na himwala'i ta hi'aino, eeta tupwadi ainodi hibagibagili alili, na tupwadi ahipuwai, na tupwadi nigele hiya'aino ili'ilimani.'

**9** Ta Yeisu aidiyai iwalo, 'Ebe matalinamiu walo teina ambenalei'.

### *Hava vehabana Yeisu iwalo vegevegedine*

**10** Multai bodaone hilo'uhagwali na Yeisu ibom imiyamiya, ta tupwadi tomowa na ana taumuli-taowowa hitau tuwelo wone baidadiyao hilaoma ta Yeisu ainai hipanivila, hiwalo, 'Yam walovegevediwone hava adi masele?'

**11** Na Yeisu iwalo, 'Omiu bada Yaubada hanapu imohegomiu'o yo yana loina holadi amhana-hanapuidi, na hesi tomowa bagibagilidi nigele.

**12** Hiya walovegevedi hibenalei na ana nuwamasele nigele hiyahanapui, na hinage ana hanapu hibehabeha na nigele howahowadi hilobai. Eeta hinage nigele howahowana yadi pwanoliwone aidiyena hinuwabui na Yaubada inuwahamuidi.'

*Walovegevedi patu vehabana ana livahi  
(Madiu 13:18-23; Luke 8:11-15)*

**13** Ta Yeisu aidiyai iwalo, ‘Vedova yagu walovegevedi teina nigele amyanuwamasele awa? Yede vedova mata tupwana walovegevedi teina dova amnuwamaseleine?’

**14** ‘Taupaihowane Yaubada yana walo iveau budebudeyanaei.

**15** Tupwadi patuwa hibe'u amwahai dova tomowa hiya Yaubada yana walo hibenalei na Tomodulele ilaoma aidiyena ivaivehuludi.

**16** ‘Hinage dova patuwone malagaigaima ainai hibe'ube'u, ebeha tomowadine Yaubada yana walo hibenalei mayadi yaliyaya hitatalamne,

**17** na nigele lamdine iyayaiyai yo iya'abidobi, eeta hauga habuluna ainai himiyamiya, yo ebe aiteya hauga ainai Yaubada yana walo ana yemidi vehabana vitai nuwana alehao hilobai mata hibe'u mwayamwayau.

**18** ‘Na patuwa haihaili womawomalidi aidiyai hibebe'uwa dova tomowaowa hiya Yaubada yana walo hibenalei,

**19** na wasawasa yo bale'u yana paulao adi nuwatuwu aidiyena Yaubada yana walo hinuwapwanopwanowei eeta nigele howahowana hi'aino.

**20** ‘Na patuwa toputopu namwanamwana ainai hibebe'uwa dova tomowaowa hiya mayadi atetalam Yaubada yana walo hibenalei, ta ainodi namwanamwadi. Tupwadi ainodi bagibagili alilidi, na tupwadi ahipuwai na tupwadi nigele hiya'aino ili'ilimani.’

*Walovegevedi lampa vehabana  
(Luke 8:16-18)*

**21** Yeisu hinage alidiyai iwalo, ‘Havena lampa ala'alahina walata yo halabi ainaena ta'oi'oihamui, na hesi maseleyai tamwauwi ta imasele.

**22** Ta ebe ginauliwo dawadawanidi abo mata maselenane i'abiye mahalavaedi yo ta'itadi.

**23** Ebe matalinamiu walo teina ambenalei.’

**24** Na hinage, ‘Amnuwatuwu avivini yo walo ambenali ili'ilimanidi, wuwuna ebe omiu hava am'aiyauya mata dova ana maiha amvai na hesi ma'ana yemutulai.

**25** Wuwuna ebe yaiya ainai Yaubada yana tobwatobwa, mata tobwatobwanane ilauhepoiei. Na ebe yaiya ainai nigele Yaubada yana tobwatobwa, mata hava namwanamwana ainai imiyamiya Yaubada ainaena ivaivehuludi.’

### *Walovegevegedi venuvenu vehabana*

**26** Yeisu hinage iwalo, ‘Yaubada yana paihowa nuwana yana loina tomowa aidiyai dova hinage venuvenu towaho yana tanoviyyai i'umaidi,

**27** na towahonane boniyai ehebo ehebo i'eno na i'ahubena itowolo, na venuvenuwone hi'ini'ini yo hihaihaili, na hesi yadi ini wuwuna nigele iyahanapui.

**28** Wuwuna toputopu iya iloina yadi ini yo yadi aino vehabana,

**29** na multai abo ainona ihuna tau'abi tanoviwa ivetuwwuni yo ilau'eli.’

### *Walovegevegedi patu habuluna vehabana*

**30** Yeisu hinage iwalo aulidi iwalo, ‘Vedova Yaubada yana Abaloina walovegevegediyena ya'abiye masele alimiyyai?

<sup>31</sup> Nuwana teina dova ehebo aiwa patuna ainai yawalo yepatu neta magimagi vehabana. Magimagi patuna habuluna,

<sup>32</sup> na ebe ta'umai na i'ini yo ive'aiwa mwala'i, mata lagalaganao mwala'idi imwauwidi, ta lagalaganao logulogudiyai lowolowo yadi abatowa.'

*Yeisu yana walovegevegedi bagibagilidi  
(Madiu 13:31-34)*

<sup>33</sup> Yeisu yana guguya aidiyai walovegevegedi bagibagilidi aidiyena ive'ive'ita, yo ebe tomowa aidiyena howahowana hihanapui.

<sup>34</sup> Iya hauga bagibagilidi walovegevegediyena iguguya bodao aidiyai, na yana hevahevaliwone hibom aidiyai walovegevegediwone ilivalivahidi.

*Yeisu yaumai yo bagodu iloinaedi  
(Madiu 8:23-27; Luke 8:22-25)*

<sup>35</sup> Lavilaviyai Yeisu yana guguya wagaena ive'ovi ta ana taumulitaone aidiyai iwalo, 'Amgeluma yo ta geyo'awa vali tupwai'.

<sup>36</sup> Higelu na boda le'awai hilaugabaidi, na tupwana waga hinage baidadiyao,

<sup>37</sup> na 'wavilivili mwala'ina itowama, ta bagodu wagai ihiwado'odo'owei ta muhamuhana hihanene.

<sup>38</sup> Na Yeisu waga aiyiuwai ana uludai bada imwauwiya'o ta i'eno i'iwahi'o, na ana taumulitaone hivavanoine ta hiwalo, 'Taubada, utowolo ta uhaguigita mata dova ta tamwalowoi'.

<sup>39</sup> Eeta Yeisu itowolo ta yaumai yo bagodu iloinaedi, iwalo, 'Badagi ulaumwau yo

udaumwali!' Eeta yaumai itowalaumwau, na ni'u maudoina idadaumwaline.

<sup>40</sup> Na ana taumulitaone aidiyai iwalo, 'Hava vehabana ammememeheuhine? Vedova nigele amyayemidiyegau?'

<sup>41</sup> Na nuwadi hipwanopwano na himeheuhi, ta hibom aidiyai hiwalo, 'Towaho havahava teina ta yaumai yo bagodu alinana hibenalei yo himumilitaeine?'

## 5

*Yeisu alu'aluwa yababadi iheusili mahalavaedi  
(Madiu 8:28-34; Luke 8:26-39)*

<sup>1</sup> Haugana higeyo'awa ta hiluwu Gelasinewone yadi gadowai,

<sup>2</sup> ta wagaena Yeisu i'aitulu magumaguwai, na towaho ehebo ilolobaine alu'aluwa yababana ainai imiyamiya, yana abamiya guda ainaena imahalava, na gudanane tomowa adi magai.

<sup>3-4</sup> Na towaho teina mwalona tomowa hitowoi ebeha hipai gulawa pwawapwawati ainaena, na nigele howahowadi, wuwuna hauga maudoina gulawaone iwutuwutuhidi nimanaena yo aenaena, na nigele yaiya howahowana yo i'abi avivini, na ilauvehuludi ta ilau nu'ulai,

<sup>5</sup> na ana boniyai yo ana ahubena magaiyai yo oya aidiyai ilohalohagali, na hauga maudoina gaima ainaena italatalauyoi.

<sup>6</sup> Na towahonane Yeisu bada amwaha daodaowena i'itaya'o, eeta isagen ta Yeisu mehenai ipwagogo,

<sup>7</sup> na ilohagali iwalo, 'Yeisu yo, owa Yaubada Tauwahiyala Natuna, hava utowotowoi ta

mata upaihowai aliguwai? Badagi! Yaubada yehanaena ya'awanoi alimwai ta havena u'abi'abiye muyagau.'

<sup>8</sup> Walo teina i'a'ataine wuwuna Yeisu bada ainai iwalo'o, 'Alu'aluwa yababam, towaho teina ainaena umahalava'.

<sup>9</sup> Na Yeisu hinage ipanivila alu'aluwane ainai iwalo, 'Vedova yehamne?'

Ta iya iwalo, 'Yehaguwede Bagibagilimai, wuwuna amaboda towaho teina holanai amiyamiya'.

<sup>10</sup> Na i'awa'awanoi wahiwahiyala Yeisu ainai iwalo, ebeha havena abamiyane tenem ainaena ivetavetamale mahalavaedi.

<sup>11</sup> Na tupwanane ainai maheya bagibagilidi hidumudumuli oyai.

<sup>12</sup> Ta alu'aluwa yababadine hi'awanoi Yeisu ainai hiwalo, 'Uvetalegai yo aluwu maheya tenem holadiyai'.

<sup>13</sup> Na Yeisu italamwedi ta alu'aluwaowa towahone ainaena himahalava ta maheyaowowa aidiyai hiluluwune, eeta maheyaowowa hiuyaule ta maudoidi hisagena budebudeyana ta tapatapa ainai higavai ta ni'uwai hihahanene. Na maheyaowa adi bagibagili dova 2000.

<sup>14</sup> Maheyaone adi tau'ita aviviniwone yadi meheuhiyena hidena ta hilalaune dalavai, ta ginauliwowa hi'iitadiwa maudoina hiwalo mahalavaedi dalava mwala'idi yo dalava habuludi tomowadiyao aidiyai. Na dalavaowa taniwagadiyao hilaoma yo ebeha hiya mehediyena moihana hi'ita.

<sup>15</sup> Na Yeisu ainai hilaoma ta towahowa hi'iitane, mugai alu'aluwa yababadi holanai

himiyamiyawa bada inamwanamwa'o ta ale'o ili'waya'o na imiyamiya. Tenem ainai maudoidi himeheuhi.

<sup>16</sup> Hi'ita i'ovi, na tauvinunuwone tomowa aidiyai hi'aubabadaei vedova towahonane inamwanamwane, na vedova maheyaaone yadi mwallowoi.

<sup>17</sup> Na dalava taniwagadiyao hivetuwuni tenem ainaena ta Yeisu hisosomanaei ebeha yadi dalava ilaugabaei.

<sup>18</sup> Eeta Yeisu idobidobi wagai habi gelu, na towahowa wau i'a'abiye namwanamwawa Yeisu ainai i'awanoi iwalo, 'Taubada, howahowana yamultaego?'

<sup>19</sup> Na Yeisu iwalo, 'Nigele howahowana, na hesi uwuyo yo ulau yam huhu aidiyai na Yaubada yana atemuyamuyaena i'a'abiye namwanamwagone u'aubabada ta hibenalei'.

<sup>20</sup> Na towahonane ilau abaloina Dekapolisi ana dalava 10 aidiyai, ta Yeisu yana paihowa wahiwahiyaladi vehabadi iyeyewasane, na tomowa maudoidi hibebenaleine ta nuwadi ipwanopwano.

*Yeisu waiwaihiu bwau i'abiye namwanamwadi  
(Madiu 9:18-26; Luke 8:40-56)*

<sup>21</sup> Yeisu mayana taumulitao higeyo'awauyo ta boda mwala'ina hitau'ahaiyama le'awai.

<sup>22</sup> Eena ehebo towaho yehana Yailo iya vada tapwalolo ana tau'ita avivini ilaoma ta Yeisu ilobai na mehenai ipwapwagogone,

<sup>23</sup> ta i'awanoi wahiwahiyala, iwalo, 'Taubada, natugu waihiuna ana lovala ivitai moiha, na iya bada gamahine, na nuwanuwagu ulaoma

na u'abisawahi ta inamwanamwa, na havena imwalomwalowoi'.

<sup>24</sup> Eeta Yeisu baidana hilaulau, na boda mwala'ina himulimulitaedi na hi'uha'uhauyoidi amwahai.

<sup>25</sup> Na bodaone holadiyai ehebo waihiu ma'ana lovala. Lovalanane neta 'wahina isagesagenaei bolimai 12.

<sup>26</sup> Mwalona tau'abiye namwanamwao bagibagilidi aidiyai yana mane maudoina ive'ovidi, na hesi ana lovalane imwalamwala'i.

<sup>27-28</sup> Waihiunane Yeisu imumulitaeine wuwuna mwalona wasana ibenalena'o, ta atenai inuwanuwatuwu iwalo, 'Ebe bada Yeisu ana ale'o a'ava ya'abitowoi mata yanamwanamwa'. Eeta itauvahali ta ana ale'o i'a'abitowoine.

<sup>29</sup> Na 'wahinana yana sagena ilaumwau tai, ta ibom tauna holanai ilautowoi ebeha bada inamwanamwao.

<sup>30</sup> Yeisu bada ilautwoiya'o ebeha wahiyala ainaena imahalava'o ta i'ita gwaipile ta boda ipanivilaedi iwalo, 'Yaiya agu ale'o i'a'abitowoine?'

<sup>31</sup> Ta ana taumulitaone hiwalo auline, 'Taubada, bada u'itaya'o boda hinoinoihamuigo na hi'uha'uhauhi, na owa upanivila, "Yaiya i'abitwoigaune?"'

<sup>32</sup> Na Yeisu i'ita'ita behabeha tomowa ahipudiyai yo ebe i'ita yaiya ainai yana wahiyala igegeyo'awane.

<sup>33</sup> Na waihiunane ibom yana namwanamwa wau ilolobaine ihanapuiya'o, ta ilaoma mayana batutuli yo mayana meheuhi na ipwagogo mehenai, ta iwalo mahalava moiha ebeha iya ipapaihowaine.

**34** Na Yeisu iwalo, ‘Natugu, yam yemidi ainaena unamwanamwa'o. Utowolo na mayam yaliyaya ulau. Yam lovala maudoina bada i'ovi'o.’

**35** Haugana Yeisu i'au'aubabada waihiune ainai, tupwadi tomowa Yailo yana vadaena wasa hilawenama ta hiwalo, ‘Natumwa bada yawahina i'ovi'o, na havena hinage tauve'itane yana hauga ugabagabaei’.

**36** Na Yeisu wasane ibenalei ta Yailo ainai iwalo, ‘Havena u'alu'alugavai na hesi uyemidiyegau’.

**37** Eeta Yeisu boda maudoidi i'auhidi havena himulimilitaei na bada ana taumulitao hitau tonuga baidanao, neta Pita yo Yemesa matahina Yoni.

**38** Hilau ta Yailo yana vadai himahamahalava, na woe yo dou mwala'ina holanai hibebenaleine.

**39** Na Yeisu iluwu ta iwalo aulidine, ‘Hava vehabana amdoudoune na amwoewoene? Gamahinene nigele iyamwalowoi na hesi i'eno i'iwahi'o.’ Ta himaluwei,

**40** na hesi Yeisu iheusilidi ta himahalava na gamahine tamana yo hinana yo ana taumulitaowa hitau tonugawa Yeisu baidadi hiluwu gamahinewa yana aba'eno ainai.

**41** Ta Yeisu gamahinene nimanai i'abi na iwalo, ‘Talita kumi’. Na ana bui, ‘Gamahine utowoloma’.

**42** Na itowolo mwayamwayau ta ilowolowouhi, wuwuna iya ana bolimai 12 ilobaiya'o. Na maudoidi nuwadi ipwanopwano moiha.

**43** Eena Yeisu i'auhidi iwalo, ‘Havena teya yaiya ainai amwalowalo mahalava yagu paishowa teina vehabana, na hesi gamahinene ana am'atububuni ta i'ai’.

**6***Nasaletiwone Yeisu hisosomanaei  
(Madiu 13:53-58; Luke 4:16-30)*

<sup>1</sup> Na Yeisu iwuyo yana dalavai, na ana taumulitaone himumulitaeine.

<sup>2</sup> Ta Tapwalolowai yadi vada tapwalolo ainai iluwu, ta ivetuwni ive'ive'ita, na tomowa hibenalei, ta maudoidi nuwadi ipwanopwano yana hanapu, yo yana pahowa vehabadi, na hiwalo, ‘Towaho teina havaena yana hanapune ilolobaine? Na hinage pahowaone wahiwahiyaladine nimanaena ipaipaihowaidine havaena yana wahiyala ilolobaine?’

<sup>3</sup> Na hinage hiwalo, ‘Towaho teina iya kapentawa awa? Na hinana Meli yo tahinao Yemesa yo Yosepa, yo Yudasi, yo Saimoni, yo hinage nuhunao baidadao tamiyamiya awa?’ Vehabana tomowa Yeisu hisosomanaei.

<sup>4</sup> Na Yeisu aidiyai iwalo, ‘Tauwalo mahalavao adi ve'ahihi hilobalobai vali dalava aidiyai. Na hiya yadi dalavai nigele adi ve'ahihi, wuwuna hiya yadi bodao yo yadi huhuwo hisosomanaedi.’

<sup>5-6</sup> Na Yeisu nuwana ipwanopwano wuwuna tomowa nigele hiyayemidiyei, eeta nigele howahowana na pahowa wahiwahiyaladi ipaihowaidi. Ta bada tauovalao bwaubwaudi i'abisawahidi ta hinanamwanamwane.

*Yeisu ana taumulitaone ivetamaledi habi pahowa**(Madiu 10:1, 5-15; Luke 9:1-6)*

Yeisu ita'i'ili dalava aidiyai, ive'ive'ita.

<sup>7</sup> Na ana taumulitao hitau 12 iyogaedima ta iloinaedi yo ebeha bwaubwau hita'i'ili dalava

aidiyai, na hinage loina yo wahiyala imohedi ta ebe howahowadi alu'aluwa yababadi tomowa aidiyena hiheusili mahalavaedi,

<sup>8</sup> ta yana guguya ainai iloinaedi, iwalo, ‘Havena ehebo hava amvaivai. Havena ai'ai nuwana peha nuwana mane tamahina vehabana. Neta bada yami digona nimamiyai,

<sup>9</sup> yo aemi adi huma aml'i'wadi na hesi havena ami ale'o bwauna amvaivai.’

<sup>10</sup> Na hinage iwalo aulidine, ‘Ebe aiteya vada ainai hiyogaegomiu yo ainai amluwu, vadanané ainai amvetaumana ana higa dalavanane amlaugabaei.

<sup>11</sup> Na ebe hinage dalava tupwana aidiyai ammahalava, na tomowadine nigele hiyayogaegomiu, yo hinage nigele yami guguya hiyabenaledi, dalavadine gawaladine aemiyena am'oiyeholudi na amlaugabaidi, yo ainaena amve'itadi ebeha mata vitai aidiyai imahalava.’

<sup>12</sup> Eeta ana taumulitaone hita'i'ili dalava bagibagilidi aidiyai, ta higuguya ebeha tomowa yadi mumuga yababadi hita'wata'wataedi na hinuwabui,

<sup>13</sup> yo hinage alu'aluwa yababadi tomowa aidiyena hiheusilidi, yo taulovalao maudoidi woloiyena hihaudi ta hinanamwanamwane.

*Yoni tau'abiye bapitaiso yana mwalowoi  
(Madiu 14:1-12; Luke 9:7-9)*

<sup>14</sup> Yeisu wasana tomowa hivetala au'aubabadaei tupwa maudoina aidiyai, ta wasawasa Helodi ibebenaleine tupwadi tomowa hiwalowalo ebeha ‘Yoni tau'abiye bapitaiso

mwalowoiyena bada itowlouyo'o ta mayana wahiyala ipaipaihowa'.

<sup>15</sup> Na tupwadi hiwalo, 'Iya Elaitiya'. Na tupwadi hinage hiwalo, 'Iya tauwalo mahalava ehebo dova tauwalo mahalavao mugamugaidi'.

<sup>16</sup> Helodi hinage Yeisu wasana bada ibenalena'o ta iwalo, 'Nuwana iya Yoni tau'abiye bapitaisowa, mwalona ya'o'oziye mwalowoiwa na bada itowlouyo'o'.

<sup>17</sup> Wuwuna mwalona Helodi Yoni i'abi avivini ta vada paipaiyai imwauwi, na Yoni ana abi'avivini wuwuna neta ehebo waihiu yehana Helodiyasa, Helodi tahina Pilipi asolena na Helodi ihaloi,

<sup>18</sup> na Yoni Helodi iwalo auline ebeha, 'Tenem nigele mumuga namwanamwana, wuwuna tahim asolena uhaloi'.

<sup>19</sup> Na Yoni yana guguya teina vehabana waihiuwa Helodiyasa inuwayababa moiha ta nuwanuwana na Yoni i'oiye mwalowoi, na nigele howahowana

<sup>20</sup> wuwuna Helodi inuwavi ebeha Yoni towaho dumwaluna na Yaubada yana taupaihowa ehebo, eeta Helodiwa Yoni ive'ahihiyei, na hauga bagibagilina Helodi nuwanuwana na Yoni yana walo ibenabenalei ta vehabadi i'aluwagavai.

<sup>21</sup> Multai Helodiwa yana ahubena labahina imahalava ta Helodiyasa bada amwaha inuwatuwu lobaiya'o Yoni ana oiyemwalowoi vehabana. Ahubena labahinane ana abanuwatuwu avivini mahulina hipapaihowai, ta tupwana tau-manao hiyogaedima habi ai. Taumanaone neta

gabemani adi tauloquentao, yo tau'alehao adi tau-mugaiwo yo tupwadi Galili dalavanaone adi babadao.

<sup>22</sup> Hauganane Helodi ma'ana taumanao hi'ai'ai, Helodiyasa natuna waihiuna iluwuma ta selowena i'abiye yaliyayadi. Eeta Helodi vahalawa ainai iwalo yemidi, iwalo, 'Ebe aiteya ginauli nuwanuwam u'awanoiyegau mata yatalamwei alimwai'.

<sup>23</sup> Na hinage iwalo hae i'awa tamada, iwalo, 'Moiha yawalo yemidi hava nuwanuwam yamo-hego, ebe yagu abaloyna vehabana u'awanoi mata tupwana yamohego.'

<sup>24</sup> Eeta vahalanane imahalava ta ilau hinana ainai ipanivila, iwalo, 'Hinagu, hava yam nuwatuwu ta wasawasa ainai ya'awanoi?'

Na hinana iwalo, 'Wasawasa uwalo auli uwalo, "Nuwanuwagu Yoni tau'abiye bapitaiso ulu'uluna" '.

<sup>25</sup> Vahalawa ilau mwayamwayau ta iwuyo wasawasa ainai, na iwalo, 'Nuwanuwagu teina ta'i Yoni tau'abiye bapitaiso ulu'uluna gaeba ainai umwauwi, na umohegau'.

<sup>26</sup> Ta Helodi inuwayababa moiha, na nigele howahowana yo ita'wata'wata, wuwuna wau bada iwalo yemidi'o taumanaone mehediya.

<sup>27</sup> Eeta vada paipai ana tau'ita'ita avivini ehebo iloinaei ta ilau Yoni gadona habitomna. Ainaena tau'ita aviviniwa vada paipaiyai ilau ta Yoni gadona itotomne,

<sup>28</sup> eena ulu'ulunawa gaeba ainai ido'oi ta ilawenama, vahalawa imohei, ta ivai ilalaune hinana ainai.

**29** Na Yoni ana taumulitao yana mwalowoi wasana hibenalei ta hilaoma Yoni taunane hivai himamagaiyeine.

*Yeisu bodoao iveve'aidine  
(Madiu 14:13-21; Luke 9:10-17; Yoni 6:1-14)*

**30** Yeisu yana tauyewasao hitau 12 bada hiwuyoma'o na Yeisu ainai yadi paihowa yo yadi ve'itao maudoina hi'aubabadaedi.

**31** Na tomowa bagibagilidi hilaolaoma yo hiwuyowuyo, ta nigele howahowana na Yeisu mayana taumulitao hi'aiyawasi yo hi'ai, eeta aidiyai iwalo, 'Tupwa teina talauehulu na talau ehebo tupwa balabala awawai yo tenem ainai tupwana am'aiyawasi'.

**32** Eena waga ainai higelu ta hilau ehebo balabala awawa ainai.

**33** Na bodaone Yeisu mayana taumulitao yadi gelu hi'itaya'o ta hihanapuiya'o tupwa yehana ainai hilalaune, eeta hiya yo dalava bahudi tomowadi hinage baidadiyao amwhahaena hisagena ta himahalava mugai tupwanane ainai.

**34** Na mulitai abo waga iduna, Yeisu i'aitulu maguwai, ta boda mwala'ina namonamowai i'iitadine, na i'atemuyamuyaedi wuwuna hiya bada dova sipiwo nigele adi tau'ita aviviniwo, eeta ivetuwwuni na hanapu bahuna aidiyena iveve'itane aidiyai.

**35** Na lavilaviyai ana taumulitaone hilaoma ta Yeisu ainai hiwalo, 'Taubada, tupwa teina balabala awawa na bada mahana ihugu'o,

**36** boda teina uvetamaledi hilau adi higimwala dalavao yo vadao vahalidiyai aidiyena'.

<sup>37</sup> Na Yeisu aidiyai iwalo, ‘Vedova? Omiu mata nigele amyave’aidi awa?’

Na ana taumulitao hiwalo, ‘Taubada, nigele howahowamai, wuwuna maudoidi adi ana maiha nuwana 2000 kina dova’.

<sup>38</sup> Yeisu ipanivilaedi iwalo, ‘Viha beledi alimiyai? Amlau ambeha.’

Eeta bada hilobaiya'o, ta Yeisu hiwalo auline hiwalo, ‘Beledi nima'ehe'ehebo na yama bwau alobaidi'o’.

<sup>39</sup> Eeta Yeisu ana taumulitao iloinaedi yo bodaohiyemiyadi boda yo boda awahiyai.

<sup>40</sup> Hiwaheidi ta himimiyané, boda tupwadi tomowa 100, yo boda tupwadi tomowa 50.

<sup>41</sup> Ta beledi nima'ehe'ehebo yo yama bwau ivaidi ta Tamana ainai itamayahi na i'awa yauwedo ai'aiwone vehabadi, na i'abitomwahidi ta ana taumulitao imohedi ta hi'aiyauyanedi. Na hinage yama bwauwa dova i'abitomwahidi.

<sup>42</sup> Maudoidi hi'ai ta hi'ai i'iwahi.

<sup>43</sup> Na beledi yo yama uleyadi hitau'ahaiyama ta boha 12 hi'oiye mwaudine.

<sup>44</sup> Tau'aiwone towatowaho a'ava adi bagibagili 5000 dova.

*Yeisu ni'u ewanaena ilalaune  
(Madiu 14:22-23; Yoni 6:15-21)*

<sup>45</sup> Multai ana taumulitao iloinaedi ta wagai higelu, na Yeisu iwalo, ‘Amgelu ammugai Bedesaida hali tupwai na yabom teinai bodaone yawalo hiwuyo yadi dalavai’.

<sup>46</sup> Ta higelu na Yeisu bodaowa ivetamaledi i'ovi, na ihae oyai habi awanoi Yaubada ainai.

**47** Bada iboni'o na ana taumulitao ni'u awawai hiwohewohe, na hesi Yeisu ibom magumaguwai

**48** i'itadi yadi wohe ainaena hitapiya'o, wuwuna wau yaumai mehediyyena ilaolaoma. Muhamuhana na i'ahubena Yeisu ni'une ewanaena ilaolaoma, ta ebe vahalidiyyena ilau.

**49** Tenem ainai Yeisu ana taumulitaone maudoidi Yeisu hi'ita ni'une ewanaena ilaolaoma na hinuwanuwatuwu ebeha iya alawai,

**50** ta himeheuhi mwala'ina. Na Yeisu aidiyai iwalo, 'Havena ammehemeheuhi. Yau ta'i, am'atepatu.'

**51** Ta wagai igelu baidanao na ni'u idadaumwa-line. Na nuwadi ipwanopwano,

**52** haugana boda iveve'aidine nigele hiyanuwa-masele wuwuna atedi mehedi igibu.

*Taulovalao i'abiye namwanamwadi tupwa  
Genesaleta ainai  
(Madiu 14:34-36)*

**53** Higeyo'awa tupwa Genesaleta ainai ta le'awanai hiluwu, na yadi waga tenem ainai hilowom ta hihahaene.

**54** Hihae na dalava taniwagadiyaone Yeisu hi'atai,

**55** eeta hisagesagen ta hilau dalava maudoidi aidiyai, ta taulovalao hipageidima mayadi halabi Yeisu ainai, aiteya tupwa ainai hibenalena'o ilalau na boda himulimulitaei.

**56** Ta Yeisu ita'i'ili tupwa bagibagilidi aidiyai, tupwana dalava mwala'idi yo dalava habuludi yo oyao aidiyai, na tomowa bahudi yadi tau'asiyebwao hilawedima ta abamaketi aidiyai hiha'waha'wa ta hi'awanoiyeline

hiwalo, ‘Taubada howahowana yo yama tau'asiyebwaone am ale'o papalinane hi'abitowoi?’ Na Yeisu aidiyai italam, ta ana ale'o hi'abisawahи na hinanamwanamwane.

## 7

*Yudeyaone tubudiyao yadi mumuga  
(Madiu 15:1-9)*

<sup>1</sup> Palisiwone yo loina ana tauve'itao tupwadi hinage Yelusalemaena hilaoma ta Yeisu ainai hitau'ahai,

<sup>2</sup> ta hi'ita lobaidi Yeisu ana taumulitao tupwadi hi'ai'ai, na nigele nimadi hiyawadi, eeta hi'ulumiyaedi.

<sup>3</sup> Wuwuna Palisiwone yo hinage Yudeyaone maudoidi yadi mumuga tubudiyao aidiyena neta dova: Mugai nimadi hiuwa ili'ilimanidi na abo mulitai hi'ai.

<sup>4</sup> Na hinage ebe maketi ainaena hilaoma nimadi hiuwa mugaiyedi, mulitai hi'ai. Na hinage loina bahudi tubudiyone aidiyena gaeba yo vedи yo walata adi uwa vehabadi himulitaedi.

<sup>5</sup> Eeta teina Palisiwone yo loina ana tauve'itao Yeisu ainai hipanivila, hiwalo, ‘Hava vehabana am taumulitaone tubudao yadi loina nigele hiyave'ahihiyedi, na manima bi'ibi'idi hi'ai'ai?’

<sup>6</sup> Na Yeisu aidiyai iwalo, ‘Tau'oyama omiu! Mwalona Aisaya tauwalo mahalava vehabamiu iwalo mahalava, na Yaubada yana walone hilelene teina dova:

“Tomowaone teina hopadiyena hive'ahihiyegau, na atediyena nigele.

<sup>7</sup> Na hinage aliguwai hitapwatapwalolo oyama, wuwuna yadi ve'itao yau nigele aliguwena, na hesi tomowa bada yadi nuwatuwuwena.”,

<sup>8</sup> Ta Yeisu iwalo aulidi hinage, iwalo, ‘Moiha ta'i, yami mumuga yababadi aidiyena Yaubada yana loina ammwaudawanidi, na tubumiyaو hesi yadi mumuga ammulimulitaedi’.

<sup>9</sup> Na hinage iwalo, ‘Amhanapu moiha ta yami paihowa ainaena; Yaubada yana loina amta'wata'wataedi na hesi tubumiyaone yadi mumuga am'abi avivinidi.

<sup>10</sup> Mugai Mosese Yaubada yana loina iwalo mahalavaena'o, iwalo, “Tamam yo hinam uve'ahihiyedi”. Na hinage iwalo, “Ebe yaiya tamana nuwana hinana i'awa yababaedi, ilowoinane yo am'oiye mwalowoi”.

<sup>11</sup> Na omiu yami ve'ita oya'oyama teina dova, “Ebe ehebo yaiya tamana yo hinana iwalo aulidi iwalo, ‘Yagu tobwatobwa bada yatalamwena'o Yaubada ainai ta ve'ave'ahihina, ainaena nigele howahowana yo yahaguigomiu’.”

<sup>12</sup> Teina yami loina ainaena tomowa yadi hagu tamadiyao yo hinadiyao aidiyai am'au'auhidi.

<sup>13</sup> Tubumiyaone yadi loina teina ainaena, yo yami ve'ita bagibagilidi dova aidiyena, Yaubada yana loina amyepaipaihiyei.’

*Tomowa adi abiye yababa  
(Madiu 15:10-20)*

<sup>14</sup> Bodaone iyogauyowedima na iwalo aulidine, ‘Yagu walo teina maudoimiu ambenaledi na am-nuwamasele:

**15-16** Nigele teya hava iyamiyamiya ebe ta'ai na hi'abiye bi'igita, na hesi nuwatuwuwo atedaena hilaolaoma hiya howahowana hi'abi'abiye bi'igita.'

**17** Eeta Yeisu mayana taumulitao bodaone hilauvehuludi ta vadai hiluluwune, na ana tau mulitaone hipanivilaeine hiwalo, 'Howahowana yam walo vegevegedine tomowa aidiyai ebe ulivahi alimaiyai?'

**18** Na Yeisu aidiyai iwalo, 'Nuwana omiu hinage yami nuwatuwu nigele iyamasele awa? Ainaede nigele amyahanapui ebeha hava ta'ai na iluwu holadai mata nigele iya'abiye bi'igita,

**19** wuwuna nigele atedai iyalau na hesi diyada a'ava ainai iluwu, na mulitai abo ilau mohomoho ainai.' (Yeisu yana ve'ita teina ana hanapu, ebeha nigele teya ai'ai laulaugagayona, na hesi maudoina howahowana ta'ai.)

**20** Yeisu hinage iwalo, 'Hava tomowa atediyena imahamahalava howahowana i'abiye bi'idi,

**21** dova mehe'ayo, aivavali, yemwalowoi, pwanoli,

**22** aiduma, nuwatuwu bi'ibi'idi, oyama, abi maitawahola, alomagigili, vetalapili, nuwahae hae, na talinatui.

**23** Teina nuwatuwu yababadine tomowa holadiyena himahamahalava na hi'abi'abiye bi'idi.'

*Ehebo waihiu yana yemidi Yeisu ainai  
(Madiu 15:21-28)*

**24** Tenem ainaena Yeisu itowolo na ilalaune Taya yo Saidoni tupwadiyaone aidiyai, ta ehebo vada ainai iluwu, wuwuna nigele nuwana yo

tomowa hihanapui yana laoma vehabana. Na hesi nigele howahowana yo imiya aidawani,

<sup>25-26</sup> wuwuna ehebo waihiu Yeisu yana laoma wasana ibenalena'o. Na waihiunane nigele Yudeya tomowana na hesi iya Pinisiya waihiuna tupwa Siliya holanaena, na natuna waihiuna bada alu'aluwa yababana i'abiye yababaya'o, eeta hinana ilaoma ta Yeisu ainai ipwagogo aitulu, ta i'awanokiyeine yo ebe alu'aluwa yabanawa natuna ainaena iheusili mahalavaei.

<sup>27</sup> Na Yeisu iwalo, ‘Ilowoinanei ta hedaheda adi yamohe mugaiyedi, na nigele howahowana hedaheda adi yavai ta edewa yamohedi’.

<sup>28</sup> Na waihiune iwalo, ‘Ehewa Taubada, na hesi edewa vatavata elauhanaena hedaheda adi mugumuguna ainaena hi'ai'ai’.

<sup>29</sup> Na Yeisu iwalo, ‘Neta walo moiha. Utowolo na uwuyo yam vадai, alu'aluwa yababana natum ainaena imahalava'o ta bada inamwanamwa'o.’

<sup>30</sup> Eta itowolo ta ilalaune yana vадai, na natunane ilobai yana aba'eno ainai, bada inamwanamwa'o.

### *Yeisu tautalina 'wabali i'abiye namwanamwa*

<sup>31</sup> Yeisu Taya ilaugabaei na ilalaune Saidoni, na hinage ibuidi'wa Dekapolisi tupwanaone aidiyena ta imahalava Galili ni'una ainai.

<sup>32</sup> Na ehebo towaho hilauvaiyamane Yeisu ainai iya talinana 'waba'wabalina, na hinage guguguna. Yeisu hi'awanokiyei yo ebeha i'abitowoi na inamwanamwa.

<sup>33</sup> Na Yeisu towahonane ilauvai ta bodaone aidiyena hitatauwahine hibom, na Yeisu nimana towahowa talinanai imwauluwuwedi, na mulitai

ibom nimana ihowai, na towahone memenana i'abitwoine.

<sup>34</sup> Ta Yeisu i'ita hae galewai na atemuya-muyaena iwalo auli iwalo, 'Epapata', neta ana bui 'Ulotaho'e'.

<sup>35</sup> Eeta towahonane talinana hilotaho'e, na hinage memenana bada inamwanamwa'o, yo howahowana i'aubabada na ibenali ili'ilimani.

<sup>36</sup> Yeisu tomowa i'auhidi ta ebeha havena yana paishowawa hiwalowalo mahalavaei. Na laugagayone nigele hiya'ita avivini, na hesi hiyewasaei tomowa aidiyai.

<sup>37</sup> Ta hiya bada hibenalena'o nuwadi ipwanopwano mwala'ina na hiwalo, 'Yana paishowa maudoina namwanamwana na abanuwawanopwano, wuwuna talina 'wabali i'abiye maseledi, na gugugudi i'abiye dumwaludi ta hi'au'aubabada'.

## 8

### *Yeisu boda 4,000 iveve'aidine (Madiu 15:32-39)*

<sup>1</sup> Hauga tenem ainai boda mwala'ina hinage hitau'ahaiyama Yeisu ainai, na nigele adi. Ta ana taumulitao iyogaedima na aidiyai iwalo,

<sup>2</sup> 'Tomowa teina ya'atemuyamuyaedi, wuwuna bada ahubena tonuga teinai baidaguwao amiyamiya, na nigele adi.

<sup>3</sup> Ebe mavahalidi yavetamaleuyoidi mata amwahai hitai, wuwuna tupwadi amwaha daodaowena hilalaomane.'

<sup>4</sup> Eena Yeisu ana taumulitaone ainai hiwalo, 'Vedova balabala awawa teina, na mata vedova tomowaone adi talobaine?'

**5** Ta Yeisu ipanivilaedi iwalo, ‘Viha ami belediwone?’

Na hiwalo, ‘Beledi 7’.

**6** Eeta boda iloinaedi ta bale'uwai himimiyane, na beledi 7 ivaidi, na vehabadi i'awa yauwedo Yaubada ainai, ta i'abitomwahidi, na ana tau-mulitao imohedi, yo tomowa aidiyai higuyauwei ta hi'a'aine.

**7** Tupwana yama habuludi hinage himiyamiya, ta Yeisu vehabadi i'awa yauwedo ta ana tau-mulitao iloinaedi hinage higuyauwedi tomowa aidiyai.

**8** Eeta maudoidi hi'ai ta hi'ai i'iwahi na mulitai uleya hitano'ahaiyama ta boha 7 hi'oiye mwaudine.

**9** Na bodaone adi bagibagili 4000 dova.

**10** Tenem ainai ivetamaleuyoidi, na mayana taumulitao himwayamwayau ta yadi wagai higelu, ta Dalimanuta tupwanaena hilalaune.

### *Palisiwone nuwanuwadi ve'ive'ilala hi'ita*

**11** Palisiwone hilaoma, ta Yeisu ainai hi'awa pa'ipa'i'i, ta hitowoi yo ebeha ve'ive'ilala ehebo ipaihowai vehabadi na hi'awa moiha ebeha yana wahiyala Yaubada ainaena ilaoma.

**12** Na Yeisu mayana nuwayababa aidiyai iwalo, ‘Vedova ta yaso teina omiu nuwanuwamiu ve'ive'ilala, na hesi mata nigele ve'ive'ilala amya'ita’.

**13** I'ovi na itauvehuludi na wagai igeluyo ta higegeyo'awane hali tupwai.

*Helodiyo Palisiwone yadi ve'ita dova beledi ana  
aba'abiyeseheha*

*(Madiu 16:5-12)*

**14** Adi tamahina nigele hiyavai wuwuna hinuwapwanopwanowedi, na beledi ehebo ta'i wagai itutupwane.

**15** Ta Yeisu ivenuwamwauwedi iwalo, ‘Palisiwone yo Helodi adi beledi ana abiyeseseha ainaena am'ita avivinigomiu’.

**16** Eeta taumulitaone hibom aidiyai hiwalo, ‘Nuwana Yeisu yana walo wuwuna ada tamahina tanuwapwanopwanowei’.

**17** Na Yeisu yadi nuwatuwu bada ihanapuiya'o ta iwalo, ‘Hava vehabana amwalowalo ebeha nigele ami tamahina? Neta nigele vehabana yayawalo. Nuwana howola manuwapwanopwanomiu, ta nigele howahowana yo yagu walo amhanapuidi.

**18** Mamehemiu na hesi nigele amya'ita, na hinage matalinamiu, na hesi nigele amyabenaledi, ainaede nigele howahowana amnuwatuwu avivinidi yagu paihowa bodaone adi ve'ai vehabana awa?

**19** Hauganane beledi nima ehe'ehebo ainaena tomowa 5000 yaveve'aidine, na tupwa viha boha amtatano'ahaidine?’

Ta hiwalo, ‘Boha 12’.

**20** Na Yeisu ipanivila hinage, iwalo, ‘Na hauganane beledi 7 ainaena tomowa 4000 yaveve'aidine, na tupwa viha boha amtatano'ahaidine?’

Na hiwalo, ‘Boha 7’.

**21** Eeta Yeisu iwalo, ‘Omiu besiwa yami nuwatuwu nigele hiyamasele’.

*Yeisu taumehe gibugibu i'abiye namwanamwa*

**22** Mulitai Bedesaida ainai hilaoma, ta towaho taumehe gibugibu tomowa hilauvaiyama Yeisu ainai, ta hi'awanoiyei yo ebe i'abitowoi na inamwanamwa.

**23** Na Yeisu taumehe gibugibuwa nimanai i'abi ta ilauvai, na dalavanane ainaena himahalava. Ta Yeisu towahonane mehena iwulaidi na nimanena mehena i'abitowoidi na iwalo, ‘Howahowana hava u'itadi?’

**24** Na towahonane ivinuvinunu ta iwalo, ‘Tomowa ya'itadi na adi ita dova aiwa hilowolowouhi’.

**25** Na Yeisu hinage towahonane mehena i'abitwoiuyoi, ta ivinunuyo, mehena himasele moiha, na ginauli maudoidi i'itadine.

**26** I'ovi na Yeisu ivetamalei, iwalo, ‘Havena uwuyowuyo dalava mwala'ina ainai, na hesi ulau yam vadai’.

*Pita iwalo mahalava Yeisu vehabana  
(Madiu 16:13-20; Luke 9:18-31)*

**27** Tenem ainai Yeisu mayana taumulitao hilalau Sisaliya Pilipai dalavanao vehabadi, na amwahai ana taumulitao aidiyai iwalo, ‘Vedova tomowa yadi walo vehabagu ebeha yau yaiya?’

**28** Na ana taumulitaone hiwalo, ‘Tomowa tupwadi hiwalo ebeha owa Yoni tau'abiye bipitaiso, na tupwadi hiwalo ebeha owa Elaitiya, na tupwadi hiwalo ebeha owa tauwalo mahalava mugamugaina teya’.

**29** Eena hinage ipanivilauyowedine, ‘Na omiu vedova yami nuwatuwu ebeha yau yaiya?’

Na Pita iyemaiha iwalo, ‘Owa Besinana towahona’.

**30** Na Yeisu ivenuwamwauwedi, iwalo, ‘Havena yaiya ainai amwalowalo mahalavaegau’.

*Yeisu iwalo mahalava yana mwalowoi vehabana*

(*Madiu 16:21-28; Luke 9:22-27*)

**31** Hinage ivetuwanu yo hava howola abo ilobai ive'itaei aidiyai, iwalo, ‘Yau Tomowa Moihagu howola abo muya mwala'ina yalobai. Wuwuna babadaone yo taupwaoliwone mwala'idi yo loina ana tauve'itao mata hisosomanegau, yo hi'oilye mwalowoigau, na ahubena tonuga dagelanai abo yatowolouyoma.’

**32** Yeisu yana walo teina ainaena imwau mahalavaena'o yana mwalowoi vehabana. Na Pita Yeisu ilauvai ta baidana hilau lovai, ta iwalo tom-tom ebe havena ginauliwone teina himahama-halava Yeisu ainai.

**33** Na Yeisu i'ita gwaipile ta ana taumulitao iv-inuvinunuidi, ta Pita iwalo yagai, iwalo, ‘Owa Tomodulele, teina ta'i ulaugabaigau, wuwuna yam nuwatuwu tomowa yadi nuwatuwu na nigele Yaubada yana nuwatuwu dova’.

**34** Eeta Yeisu boda maudoidi yo ana taumulitao baidadiyao iyogaedima ta aidiyai iwalo, ‘Yaiya ebe nuwanuwam na umulitaegau, ilowoinanego na yam nuwatuwu uta'wata'wataedi yo hinage am aiwa lagalagana u'avalai ta umwalowoi, neta dova agu mulita ana amwaha.

**35** Na ebe yaiya yawahina inuwavi, mata yawahinane ivetau'wadalele. Na ebe yaiya vehabagu yo wasa namwanamwana vehabana yawahina italamwei na imwalowoi, iya mata yawahina moiha ilobai.

**36** Ebe yada wasawasao mwala'idi bale'uwai talobaidi neta ginauli awa'awawa, na hesi ginauli mwala'ina neta yawahida moiha.

**37** Wuwuna ebe yawahida moiha tavetau'wadalele, nigele hinage teya ana miyalae iyamiyamiya.

**38** Yau Tomowa Moihagu, na ebe yaiya owa vehabagu uhinimaya na uuvalaegau, yaso teina yababadi na pwanopwanolidi mehediyi, howola abo yauvalaego, hauganane Tamagu yana wasawasa pigapigabuna ainaena yawuyoma yana tausagenawasaone baidaguwao.

## 9

**1** 'Na hinage yawalo ili'ilimani alimiya ebeha tupwadi alimiya havena ammwalomwalowoi ana higa Yaubada yana loina wahiwahiyalana imahalava yo am'ita'.

*Yeisu ana ita udoina  
(Madiu 17:1-13; Luke 9:28-36)*

**2** Ahubena 6 hi'ovi, na Yeisu ana taumulitao tonuga ilauvaidi, hiya Pita yo Yemesa yo Yoni, ta baidanao hihahaene oya ehebo ewanai ta hibom himiyamiya, na hi'iitane Yeisu ana oleya pigapigabuna,

**3** na ana ale'owone hihewahewa moiha, ana ita nigele ehebo yaiya bale'uwai howahowana yo ale'o i'abiye masele yo ana hewa dova.

**4** Na hinage Elaitiya yo Moses himahalava ta Yeisu baidadi hi'au'aubabada.

**5** Ta Pita Yeisu iwalo auline, iwalo, 'Taubada, yada miya teina namwanamwana, eeta yami

gwau tonuga a'abidi, ehebo owa, ehebo Moses, na ehebo Elaitiya'.

**6** Neta Pita bada iwalowalo awa'awawa wuwuna ma'ana geluwone himeheuhi'o.

**7** I'ovi na yaloyalovi hinage i'aituluma ta i'oihamuidine, na yaloyalovine ainaena ehebo alinana hibebenaleine, iwalo, 'Teina Natugu moi-hana. Yana walowo ambenaledi.'

**8** Ta himwayamwayau hi'ita'ita'auhi, na Yeisu bada ibom na nigele teya hava hiya'ita.

**9** Eeta oyaena hi'ai'aitulu, na Yeisu ilaugagayowedi, iwalo, 'Ginauliwone wau am'i'itadine, havena tomowa aidiyai amwalowalo mahalavaedi ana higa yau Tomowa Moihagu mwalowoiyena yatowlouuyoma'.

**10** Ta laugagayowa hinobuwei, na hibom hi'au'aubabada hiwalo, 'Yana walowone towolouyo vehabana vedova ana hanapu?'

**11** Na Yeisu ainai hipanivilane hinage, hiwalo, 'Hava vehabana loina ana tauve'itao hiwalo, ebeha Elaitiya ilaumugaima mulitai abo Besinana ilaoma?'

**12-13** Na Yeisu iwalo, 'Ehe, Elaitiya iya ebeha ilaumugaima yo ainaena ginauli maudoidi i'abiye dumwadumwaludi. Na hesi Elaitiyawa bada ilaoma'o, na hesi tomowa hipaihowa yababana ainai hava yadi nuwatuwu, dova Buki Ve'ahihi iwalo mahalavaena'o. Na hinage yau Tomowa Moihagu, Buki Ve'ahihi iwalo mahalavaegau ebeha muya mwala'ina yalobaidi yo hinage tomowa hisosomanaegau?'

*Ehebo gama ana lovala  
(Madiu 17:14-20; Luke 9:37-43)*

**14** Mulitai oyaena hi'aituluma ta ana taumulitao maudoidi hilobauyoidi yo boda bagibagili baidadiyao, na hinage loina ana tauve'itao baidadiyao hiveve'awa pa'ipa'i'i.

**15** Na hauganane bodaone Yeisu hi'ita, nuwadi hipwanopwano mwala'ina, ta ainai hisagena mwayamwayau habi velauwei.

**16** Na Yeisu yadi ve'awapa'ipa'i'i vehabana ipanivila, iwalo, ‘Hava vehabana am'au'aubabadane?’

**17** Na ehebo towaho bodaone aidiyena Yeisu ainai iwalo, ‘Taubada yadi ve'awapa'ipa'i'i wuwuna natugu, alu'aluwa yababana ainai ta nigele howahowana yo i'aubabada, na hesi am taumulitao nigele howahowadi yo hi'abiye namwanamwa.

**18** Na ana lovalane tupwana hauga alu'aluwa yababana yana paihowaena itai na awanaena gwalagwalabuho himahamahalava, yo ivesalatau'i'i eena ibatubatutuli. Na am taumulitaone bada ya'awanoiyedi'o yo ebeha alu'aluwa yababana gama ainaena higabae mahalavaei, na nigele howahowadi.’

**19** Ta Yeisu aidiyai iwalo, ‘Omiu yede vedova? Ta nuwamiu hipwanopwano aliline! Bada yami nuwapwano ainaena ya'abitau'wata'o. Hola gamanane amlauvaiyama, ya'ita.’

**20** Eeta gamanane hilawei ainai, na alu'aluwa yababana Yeisu i'i'itane, eeta i'abilauwi ta gamawa itai, na bale'uwai ibe'u, na ibatubatutuli na awanaena gwalagwalabuho imahamahalava.

**21** Na Yeisu gama tamana ainai iwalo, ‘Aiteya hauga ainai yana lovala ivevetuwunine?’

Na tamana iwalo, ‘Yana hauga heda ainaena.

<sup>22</sup> Ebe itai hauga tupwana ainai igebeuyoi aiwa ala'alahidi aidiyai, na tupwana hauga we'aha ni'uni'udi aidiyai igebeuyoi yo muhamuhana i'oiye mwalowoiuyo.’

<sup>23</sup> Na Yeisu towahonane iwalo auline, ‘Bada uwalo ebe howahowana, awa? Na hesi unuwatuwu avivini ebe tayemidi, ginauli maudoina malamalaidi alidai.’

<sup>24</sup> Tenem ainai towahonane iwalo mwala'i, iwalo, ‘Bada yayemidi'o, na nigele yemidi moiha. Nuwanuwagu yo yagu yemidi u'abiye wahiyala.’

<sup>25</sup> Na Yeisu boda maudoidi hisagesagenama i'itadine, eeta alu'aluwa yababana iwaloweine, iwalo, ‘Owa alu'aluwa yababam yam paihowaena gama iyauyaule, yaloinaego yo utauvehulu ta'i, yo havena hinage ehebo hauga uluwuluwuyo ainai’.

<sup>26</sup> Eeta alu'aluwawa iwuiwui ta gama i'abiye tai, ta ibatubatutuli mwala'ina, na alu'aluwa yababana ainaena imahalava ta ilalaune. Na bodaone gama hi'iitane ana ita dova imwalowoi, na himeheuhi ta hiwalo, ‘Bada imwalowoi'o’.

<sup>27</sup> Na Yeisu gama nimanai i'abi ta i'abiye towolone, bada inamwananamwa'o.

<sup>28</sup> Multai Yeisu mayana taumulitao hiluwu vadai, ta nemai hibom. Eena ana taumulitaone Yeisu ainai hiwalo, ‘Taubada, vedova ai ta nigele howahowamai yo alu'aluwa yababana aheusili mahalavaei?’

<sup>29</sup> Na Yeisu iwalo, ‘Nigele teya hava ainaena alu'aluwa yababadi taheusilidi. Neta ta'i awanoiyena Yaubada ainai.’

*Yeisu yana mwalowoi vehabana i'au'aubabada  
(Madiu 17:22-23; Luke 9:43-45)*

**30** Yeisu mayana taumulitaone dalavanane hitauvehulu. Ta Yeisu nigele nuwanuwana boda hihanapui aiteya ainai hilalau, ainaede Galili ana amwahanaena hilalaune,

**31** ta ana taumulitao ive'itadine yana mwalowoi vehabana, iwalo, ‘Howola yau Tomowa Moihagu agu tauhuhulawa abo ihuhulaegau agu alehao aidiyai yo hi'oixe mwalowoigau, na ahubena tonuga tuluhanai abo yatowolouyo’.

**32** Na yana aubabadane vehabana nigele hiyanapui, na hesi nigele ainai hiyapanivila, wuwuna himeheuhi.

*Tauloina iya taumulita  
(Madiu 18:1-5; Luke 9:46-48)*

**33** Bada dalava Kapeneum ainai himahalava ta vadai hiluluwune, ta nemai Yeisu ipanivila ana taumulitao aidiyai iwalo, ‘Aiteya ginauli vehabana am'awa'awa pa'ipa'i'i amwahai?’

**34** Na hihinimaya ta nigele hiyayemaiha, wuwuna yadi awapa'ipa'i'i neta ebeha yaiya aidiyena ivetaumugai.

**35** Eeta Yeisu imiya na hitau 12 iyogaedima na ive'ita aidiyai, iwalo, ‘Ebe yaiya owa nuwanuwam ta alimiyyena uvetauloina ilowoinanego na ubom umwau aituluyowego yo uvetaupaihowa am geluwo vehabadi’.

**36** Ta ehebo gama ilauvaiyama ta ahipudiyai ivetowolo na i'atuhapwali ta iwalo aulidine,

**37** iwalo, ‘Ebe yaiya owa gama teina dova u'awa taumanaei yau vehabagu, neta yau hinage ya'awa taumanaego, na nigele ebeha yabom aliguwai, na hinage agu tauvetamale Yaubada baidagu u'awa taumanaegai’.

*Ebe yaiya iya nigele iya'ale'alehaegita iya ih-aguhaguigita*  
(Luke 9:49-50)

**38** Yoni ivetuwni na iwalo, ‘Taubada, ehebo towaho a'i'itane yehamwena alu'aluwa yababadi iheuheusilidi, eeta alaugagayowei, wuwuna towahonane nigele yada boda’.

**39** Na Yeisu hesi iwalo, ‘Havena amlaulaugagayo. Wuwuna ebe ehebo yaiya ginauli wahiwahiyaladi yehaguwena ipaipaihowaidi, nigele mata iyahinaligau.

**40** Ebe yaiyadiwo nigele hiyave'alehaegita hiya ada haguwo.

**41** ‘Na hinage amnuwatuwu avivini neta ebe gadomiu imagumaguni na yaiya bwahi ivenu-magomiu wuwuna omiu Besinana yana bodoa, iya ana maiha namwanamwana howola abo ilobai.

*Hava i'abiye yababagita*  
(Madiu 18:6-9; Luke 17:1-2)

**42** ‘Ebe yaiya itowoi na agu tauyemidi teya heda teina dova na i'abiye be'u, towahonane nuwana waihiunane ilowoinanei na gaima mwala'ina gadonai hihipwai ta magaimana hivehanene ni'uwai.

**43-44** ‘Hinage ebe nimam i'abiye be'ugo ilowoinanego yo utom vehulu. Neta nigele ana

yababa ebe manima tomtomna mata yawahim namwanamwana ulobai. Na hesi iyababa alili alimwai ebe manima bwaubwaum na higabae aituluwego dalava ala'alahina ainai, tupwanane ainai aiwa nigele yana ababoho.

**45-46** ‘Yo hinage ebe aem i'abiye be'ugo ilowoinanei utomvehulu. Neta nigele ana yababa teya ebe ae ehe'ehebom mata yawahim namwanamwana ulobai. Na hesi yababa'alili alimwai ebe ma'ae bwaubwaum na higabae aituluwego dalava ala'alahina ainai.

**47** ‘Mehem hinage dova, ebe i'abiye be'ugo uwu-nihivehulu ta'i, wuwuna nigele ehebo hinage ana yababa ebe mamehe ehe'ehebom mata Yaubada yana Abaloina ulobai. Na hesi yababa alilina alimwai ebe mamehe bwaubwaum higabae aituluwego dalava ala'alahina ainai.

**48** Tupwanane ainai wesoweso hi'ai'aidi na nigele yadi aba'ovi, na aiwa ala'alahina nigele yana ababoho.

**49** ‘Ainaena tomowa maudoidi aiwa ala'alahina i'abiye namwanamwadi dova yagahu ai'ai i'abi'abiye namwanamwa.

**50** ‘Yagahu ginauli namwanamwana na ebe ana lautowoi isawali nigele howahowana yo in-amwanamwauyo. Ta ilowoinanegomiu yo yami mumuga ambom amlautowoidi adi amna dova amvelauwegomiu ehebo ehebo ainai.’

## 10

*Vinawahe vehabana  
(Madiu 19:1-12)*

<sup>1</sup> Yeisu tupwanane itauvehulu, ta Yudeya yana tupwaena ilalaune, ta igegeyo'awane bwahi Yolidani hali tupwanaena, ta boda mwala'ina hitau'ahaiyama ainai, na hinage mumuganawa dova ive'ita aidiyai.

<sup>2</sup> Na Palisiwone hilaoma ta nuwanuwadi yo Yeisu hitowoi, eeta ainai hipanivila hiwalo, ‘Taubada vedova yada loina vinawahe vehabana? Howahowana yo towaho mwanena ivinawaheyei?’

<sup>3</sup> Na Yeisu iwalo, ‘Vedova Mosese loina imomo-hegomiune?’

<sup>4</sup> Na Palisiwone hiwalo, ‘Mosese italam yo ebe towaho nuwanuwana ivinawahe, mugai pepa ainai yana ta'wata'wata iwalo mahalava, eena mwanena imohei ta ebe ivinawaheyei’.

<sup>5</sup> Na Yeisu aidiyai iwalo, ‘Mosese loina neta ilelelene omiu yami nuwapwanopwano vehabana.

<sup>6</sup> Na hesi amnuwatuwu avivini Yaubada yana yemasele mugai ainaena tomowa bwau iye-maseledine towahona na waihiuna.

<sup>7</sup> Teina wuwuna towaho tamana yo hinana ilauvehuludi na asolena baidana himiyabwau,

<sup>8</sup> yo hitau bwauwone taudi ehebo ta'i. Mwalona hitau bwau himiya wahiwahi na teina hauga bada hive'ehebo'o.

<sup>9</sup> Yaubada bada imwaubwauwedi'o, eeta nigele howahowana yaiya teya iyemiya wahiyedi.’

<sup>10</sup> Na mulitai Yeisu mayana taumulitao hi-wuyoma vadai ta taumulitaone hipanivilauyowei vinawahe vehabana.

**11** Na Yeisu iwalo aulidine, ‘Ebe yaiya towaho asolena ivinawaheyei na itawahola geyo’awa vali waihiu ainai, towaho teina mwanena mugamugaina ainai ipaihowai yababana, wuwuna ipwanoli.

**12** Na hinage ebe waihiu asolena ivinawaheyei na itawahola geyo’awa vali towaho ainai, waihiunane ipwanoli’o.’

*Yeisu hedaheda iwalo velauwedi  
(Madiu 19:13-15; Luke 18:15-17)*

**13** Tomowa hedaheda hilawedima Yeisu ainai ta ebe i’abi aidiyai. Na hesi ana taumulitaone hedahedaone hi’auhidi.

**14** Na Yeisu ana taumulitao i’itadi ta ihinahin-abodaidi iwalo, ‘Havena hedaheda amlaulaugagayowedi, na hesi amtalamwedi yo aliguwai hiloma, wuwuna hedaheda teina dova Yaubada yana Abaloina ilowoinanedi moiha.

**15** Moiha ta'i ebe yaiyadiwo nigele dova teina hedahedaone yadi yemidine, nigele mata Yaubada yana Abaloina ainai hiyaluwu.’

**16** Eeta Yeisu hedahedaone i’avalaidi ta nimana imwau aidiyai, na iwalo velauwedine.

*Wasawasa vehabana  
(Madiu 19:16-30; Luke 18:18-30)*

**17** Yeisu itowolo ta ebeha ilau, na ehebo towaho isagenama ta ipwagogo Yeisu mehenai na iwalo, ‘Taubada, yahanapuiya’o ebeha owa tauve’ita namwanamwana, eeta hava mata yapaihowai ta ebe yawahi miyamiya vateyaina yalobai?’

**18** Na Yeisu towahonane iwalo auli iwalo, ‘Vedova ta u’awa namwanamwaegaune? Nigele

teya yaiya namwanamwana; neta bada Yaubada ibom.

<sup>19</sup> Na Yaubada yana loinao bada uhanapuidi'o, neta ebeha: Havena yemwalowoi, havena pwanoli, havena aivavalii, havena ve'ewa oya'oyama, havena oyamaena tomowa yadi tobwatobwa uvaivaidi. Na hinage tamam yo hinam uve'ahihiyedi.'

<sup>20</sup> Na towahonane iwalo, 'Taubada, yagu hauga hedaa ainaena na teina wau loinaone teina yamulitaedi moiha'.

<sup>21</sup> Eeta Yeisu mayana yaliyaya towahonane ivinunui, na iwalo, 'Neta ta'i ehebo ginauli i'abiye be'ugone. Uwuyo yam dalavai, yo yam tobwatobwa maudoina uvegimwalaedi, yo adi maiha u'aiyauyanei wewelohe aidiyai, na ulaoma umulitaegau, ta mulitai yam wasawasa galewai ulobai.'

<sup>22</sup> Walo teina towahonane ibenalei na yana wasawasa mwala'ina inuwavi, ainaena nuwana iyababa moiha, ta iwuwuyone na Yeisu yana walo nigele iyamulitaei.

<sup>23</sup> Eeta Yeisu i'ita gwaipile ta ana taumulitao aidiyai iwalo, 'Ebe yaiyadiwo hiya mayadi wasawasa mwala'ina yadi luwu Yaubada yana Abaloina holanai ivitai'.

<sup>24</sup> Na ana taumulitao nuwadi ipwanopwano yana walo teina vehabana. Ta Yeisu aidiyai iwalo, 'Natuguwao, Yaubada yana Abaloina ana luwu ivitai alili.

<sup>25</sup> Moiha ta'i kameli iya lagulagu mwala'ina, eeta tupwana vitaina yo kameli nidili gudana

holanaena iluwu, na hesi wasawasao yadi luwu Yaubada yana Abaloina ainai ivitai ali'alili.'

<sup>26</sup> Yeisu yana walo teina vehabana, ana tau-mulitao hinuwapwanopwano moiha ta hiwalo auline, 'Ebe dova, yaiya yede howahowana na awanamwanamwane ilobai?'

<sup>27</sup> Eeta Yeisu ivinunuidi na iwalo, 'Ginauli teina vitai ali'alilina tomowa aidiyai, na hesi nigele iyavitai Yaubada ainai, wuwuna Yaubada ainai ginauli maudoina malamalaina'.

<sup>28</sup> Na Pita iwalo, 'Taubada, ai vedova? Wuwuna yama tobwatobwao maudoidi bada atauvehului-di'o na amumulitaegone.'

<sup>29</sup> Na Yeisu iwalo, 'Moiha, ebe yaiyadiwo omiu yami vadao, yo tahimiya yo nuhumiyao yo hinamiya yo tamamiya yo natumiya yo yami toputopu amtauvehuluidi, na hinage muya amlobai vehabagu na wasa namwanamwana ana walomahalava vehabana,

<sup>30</sup> ami maiha teina ta'i amlobai dova 100 vadao yo tahimiya yo nuhumiyao yo hinamiya yo natumiya yo yami toputopuwo, yo hinage howola abo galewai yawahimi miyamiya vateyaina amlobai.

<sup>31</sup> Na teina ta'i taumugaiwone bagibagilidi howola abo himulita, na hiya taumulita howola abo himugai.'

*Yeisu yana mwalowoi ana walomahalava tonugana*

*(Madiu 20:17-19; Luke 18:31-34)*

<sup>32</sup> Howola amwahai hihaehae Yelusalem vehabana, na Yeisu imugamugai, na ana taumulitao himulimulita, na mayadi nuwapwanopwano,

na tupwana tomowa hinage mayadi meheuhi amwahai himulimulitaedi. Eeta ana taumultaone hitau 12 iyoga'ahauyowedi, na ivetamaledi hava mata imahalava ainai,

<sup>33</sup> iwalo, ‘Teina ta'i tahahae Yelusalem. Yau Tomowa Moihagu na agu tauhuhulane ihuhulaegau taupwaoliwo mwala'idi yo loina ana tauve'itao aidiyai, yo yagu mwalowoi vehabana hiloina, yo mulitai abo himohegeyo awaegau nigele Yudeya aidiyai,

<sup>34</sup> yo hitalawahiyyegau na hihowaigau ta balavaiyena hisapigau, yo mulitai hi'oiye mwalowoigau, na ahubena tonuga abo yatowlouyoma.’

*Yemesa yo Yoni yadi awanoi Yeisu ainai  
(Madiu 20:20-28)*

<sup>35</sup> Yemesa yo Yoni, hiya Sebedi natunao, Yeisu ainai hilaoma yo ainai hiwalo, ‘Taubada, alaoma habi awanoi alimwai’.

<sup>36</sup> Na Yeisu iwalo, ‘Hava nuwanuwamiu yo yapaihowai vehabamiu?’

<sup>37</sup> Na hiwalo, ‘Nuwanuwamai na yam abaloina ainai vahalimwai amiya, ehebo nima tautuwamwena na ehebo nima eha'ehamwena’.

<sup>38</sup> Na Yeisu aidiyai iwalo, ‘Omiu yami awanoi teina vehabana nigele amyahanapui. Muya vedina ainaena mata yanuma, omiu howahowana amnuma? Na hinage mwalowoi ana bapitaiso vitainane abo yalobai, omiu hinage howahowamiu yo ambapitaiso?’

<sup>39</sup> Na hiwalo, ‘Howahowamai’.

Yeisu iwalo, ‘Moiha, vedinane ainaena mata yanumane, omiu hinage ainaena mata amnuma,

yo hinage bapitaisonane ainaena abo yabapitaiso  
omiu hinage dova ambapitaiso,

<sup>40</sup> na hesi nigele howahowagu yavesinuwa  
yaiyadiwo howola abo yagu vetauloina ainai  
nima tautuwaguwena yo nima eha'ehaguwena  
himiya, wuwuna Yaubada iya yana abaloina na  
ivesinuwa?

<sup>41</sup> Taumulitao hitau nima bwaubwau Yemesa  
yo Yoni yadi awanoi vehabana hibenalei ta adi  
modi'iniyedi.

<sup>42</sup> Ta Yeisu maudoidi iyoga ahaidima na iwalo  
aulidine, 'Omiu amhanapuiya'o hiya bale'uwai  
hiyogaedi ebeha babadao yadi tomowao  
hiloiloina yaiyaiyedi.

<sup>43</sup> Na omiu hesi havena hinage dova hiya  
ampaipaihowai. Na hesi ebe yaiya owa  
ebe nuwanuwam yo alimiyyena uvetauloina  
ilowoinanego yo am geluwo vehabadi  
uvetaupaihowa.

<sup>44</sup> Yaiya hinage ebe owa nuwanuwam yo  
alimiyyena uvetaumugai ilowoinanego yo am  
geluwo maudoidi vehabadi uvetaupaihowa.

<sup>45</sup> 'Na yau Tomowa Moihagu yalaoma bale'uwai  
nigele ebeha tomowa vehabagu hipaihowa, na  
hesi habi paihowa tomowa vehabadi, na hinage  
yatalamwegau yo yamwalowoi tomowa bagibag-  
ilidi adi livahi vehabana.'

### *Batimiyo mehena inamwanamwa*

*(Madiu 20:29-34; Luke 18:35-43)*

<sup>46</sup> Multai hilalau Yeliko ainai, na hauganane  
Yeisu mayana taumulitao Yeliko hilauvehulu,  
boda mwala'ina hinage himulitaedi, ta taumehe  
gibugibu yehana Batimiyo hilolobaine, iya

Timiyo natuna, na hauga maudoina amwaha papalinai imiyamiya ta i'awa'awanoi mane yo tobwatobwa vehabadi.

<sup>47</sup> Na Batimiyo wasa ibenalei ebeha Yeisu towaho Nasaleti ilalau, eeta Yeisu ainai iyoga, iwalo, ‘Ae Yeisu, owa Deivida tubuna, u'atemuyamuyaegau!’

<sup>48</sup> Eeta tomowa maudoidi Batimiyo hi'auhi, hiwalo, ‘Ulaumwau! Havena wui!’

Na bada iwui mwalamwala'i, iwalo, ‘Owa Deivida tubuna, u'atemuyamuyaegau’.

<sup>49</sup> Eena Yeisu itowolo ta iwalo, ‘Amyogaenama’.

Na boda hinage hiwalo, ‘Ausala, Yeisu iyogayo-gaego’.

<sup>50</sup> Eeta ana abobo ivaivehuludi, na itowolo mwayamwayau ta Yeisu ainai ilalaune.

<sup>51</sup> Ta Yeisu ainai iwalo, ‘Hava nuwanuwam yo vehabam yapaihowai?’

Na taumehegibugibuwa iwalo, ‘Taubada, howahowana yo mehegu u'abiye maseledi?’

<sup>52</sup> Ta Yeisu iwalo, ‘Ausala! Teina ta'i yam yemidiyena bada mehem hinamwanamwa'o.’ Tenem ainai mehena himaseleuyo, ta amwahai Yeisu imumulitaeine.

## 11

*Yeisu yana luwu Yelusalem ainai*

*(Madiu 21:1-11; Luke 19:28-40; Yoni 12:12-19)*

<sup>1</sup> Haugana hihaehae Yelusalem vehabana na dalavao habuludi Betani na Bedipegi vahalidiyai himahamahalava, neta oya Olibe elauhanai, na

Yelusalem mehediysi tupwana amwaha daodaona. Eeta Yeisu ana taumulitao bwau ivetamalemugaiyedi dalavaowa habuludi aidiyai,

<sup>2</sup> na aidiyai iwalo, ‘Amlau dalava tenem mehedaine ainai, na ebe ammahalava dalavanane ainai, lagulagu ehebo am’ita lobai aiwa ainai hilauhipwaiya'o, neta doniki vauvauna, iya nigele tomowa ainai hiyagelugelu, lagulagunane amlivahi yo amlawenama.

<sup>3</sup> Na ebe yaiya ipanivila alimiysi na iwalo, “Hava vehabana neta lagulagune amlivalivahine?” Towahonane amwalo auli amwalo, “Taubada nuwanuwana, na hauga ahu’ahubalina ta'i abo mulitai ivetamaleuyowenama”.

<sup>4</sup> Eeta hitau bwauwa hilau dalavanane ainai ta lagulagu doniki hilobai vada mehe’awanaena, na aiwa ainai hilauhipwaine, eeta hivetuwuni yo hilivahi.

<sup>5</sup> Hilivalivahi na tupwana tomowa hitowotowolo vahalidiyai hiwalo, ‘Hava vehabana neta lagulagune amlivalivahine?’

<sup>6</sup> Hitaubwauwa hiwalo, ‘Taubada nuwanuwana, yo hauga ahu’ahubalina ta'i abo ivetamaleuyowenama’. Ta aidiyai hitalamweine.

<sup>7</sup> Ta lagulagunane hilauvai ta hilalaweine Yeisu ainai, na adi ‘wamaena dagelana hivevehene, eeta Yeisu igelu taohani, ta ilalaune.

<sup>8</sup> Na boda bagibagilidi hinage adi ale'owo amwahai hivehedi, na tupwadi aiwa lagalagadi malugulugudi higuladi amwaha ana yepasa vehabana.

<sup>9</sup> Na tupwana boda adi mugai na tupwana boda adi mulita, na maudoidi Yeisu hino'ono'owei

na hiwuiwui, hiwalo, ‘Awalo vetuvehaeyego Taubada, Yaubada yehanaena ulaoma habi haguigai.

<sup>10</sup> Abaloina tubumaiyao Deivida ainaena imahalavauyoma. Teina vehabana Yaubada ewa'aliliyai ano'ono'owei.’

<sup>11</sup> Ta Yeisu bada Yelusalem ainai imahalava'o ta vada tapwalolo mwala'ina ainai iluwu, ta ginalauli bahudi vada tapwalolo holanai i'i'itadine, na bada ilavilavi'o, eeta mayana taumulitao hitau 12 baidanao hiwuyo Betani ta nemai hi'e'enone.

*Yeisu aiwa iwalo yagai  
(Madiu 21:18-19)*

<sup>12</sup> I'ahubena na hitowolo ta Betaniyena hiwuyo Yelusalem vehabana, ta Yeisu ivahali,

<sup>13</sup> na amwaha daodaowena aiwa ana ita dova damaya maluguna i'i'itane, eeta ilau vahalinai yo nuwanuwana ebeha ainona i'ai, na hesi i'itayawa lugu a'avana, wuwuna aiwa ai'aino howola yadi hauga.

<sup>14</sup> Eeta Yeisu aiwanane iwalo yagai, iwalo, ‘Havena hinage u'ai'ainouyo yo tomowa alimwena hi'ai'ai’. Ta yana walo teina ana taumulitao hibebenaleine.

*Yeisu taugimwala iheusilidi vada tapwalolo holanaena*

*(Madiu 21:12-17; Luke 19:45-48; Yoni 2:13-22)*

<sup>15</sup> Haugana Yelusalem ainai hilaoma, na vada tapwalolo mwala'ina holanai iluwu, na tauvegimwalao yo taugimwalao holanaena iheusili mahalavaedi, na mane ana tausenisiwo yadi tebeli

i'oibuiyedi, na gabubu adi tauvegimwala yadi abamiya hinage i'oibuiyedi.

<sup>16</sup> Na hinage vada holana ilaugagayowei yo havena tomowa mayadi maketi hilaulau vada holanaena.

<sup>17</sup> Na ive'itadi iwalo, ‘Buki Ve'ahihi ainai Yaubada yana walo hilelelene amhanapuiya'o, iwalo, “Yagu vada mata hiyogaei vada aba'awano'i tomowa maudoidi vehabadi”, na omiu am'abigwaipile yami aba'aivaval'i.

<sup>18</sup> Na taupwaoliwo mwala'idi yo loina ana tauve'itao Yeisu yana paihowa teina wasana hibenalei, na himodi'iniyei, ta hinuwaniwatuwu vedova na hi'oiye mwalowoi, na hesi nigele howahowadi wuwuna himeheuhei na hinage Yeisu yana ve'ita tomowa maudoidi nuwadi ivai.

<sup>19</sup> Na bada imasigili'o, ta Yeisu mayana tau-mulitao Yelusalem hilaugabaei, ta Betani ainai hilalaune.

*Aiwawa Yeisu iwawalo yagaiwa iwelai  
(Madiu 21:20-22)*

<sup>20</sup> I'ahubena na hitowolo habi wuyo Yelusalem, ta amwahai hilaulau, na Yeisu aiwawa iwawalo yagaiwa hi'itaya'o bada iwelai'o.

<sup>21</sup> Eeta Pita Yeisu yana walo yagaiwa inuwatuwui ta iwalo, ‘Taubada u'ita aiwawa uwawalo yagaiwa bada iwelai'o’.

<sup>22</sup> Na Yeisu aidiyai iwalo, ‘Ebe yami yemidi ammwauwi Yaubada ainai, omiu hinage paihowa wahiwahiyaladi ampaihowaidi.

<sup>23</sup> Hinage yawalo moiha alimiayai ebe yaiya owa nigele uyavenuwabwau na hesi uyemiyemidi yo hava uwalowei mata imahalava ta'i, ebe oya

tenem uloinaei yo uwalo, “Umiyadobi uhanene ni’uwai,” yam walone i’awa abiye ta’i.

<sup>24</sup> ‘Eeta yawalo alimiysi ebe hava am’awanoiyei Yaubada ainai amyemidi ta’i, ta howola abo amlobai.

<sup>25-26</sup> Hinage ebe am’awanoi Yaubada ainai ami geluwo yadi pwanoliwo amnuwahamuidi ebe hava yadi mumuga alimiysi, yo teina ainaena Tamada galewai omiu hinage yami pwanoliwo inuwahamuidi.’

*Yeisu yana loina vehabana  
(Madiu 21:23-27; Luke 20:1-8)*

<sup>27</sup> Hinage hiwuyoma Yelusalem, ta Yeisu vada tapwalolo mwala’ina holanai ilowolowouhi, ta taupwaoliwo mwala’idi yo loina ana tauve’itao yo hinage babadao hilaoma,

<sup>28</sup> ta Yeisu hipanivilaei, hiwalo, ‘Towaho, yaiya yana loinaena ta teina dova upaipaihowaine?’

<sup>29</sup> Na Yeisu aidiyai iwalo, ‘Mugai yapanivila alimiysi na ebe amyemaiha, yau hinage yawalo auligomiu yagu loina vehabana.

<sup>30</sup> Yagu panivila teina: Yaiya yana loinaena ta Yoni tau’abiye bapitaiso ipaipaihowane? Yaubada? bo nuwana ehebo tomowa?’

<sup>31</sup> Na hibom aidiyai hi’awa pa’ipa’i’iuyowedi, hiwalo, ‘Yana walo vedova mata tayemaihane? Ebe tawalo, “Yaubada ainaena”, mata iwalouyoma yo iwalo, “Abo! Hava yede vehabana ta Yoni nigele amyayemidiyei?”

<sup>32</sup> Na ebe tawalo, “Tomowa ainaena”, mata boda hi’waunihanihaegita.’ Wuwuna tomowa bagibagilidi Yoni hiyemidiyei ebeha iya tauwalo mahalava moiha.

**33** Eeta Yeisu yana walo hiyemaiha hiwalo, 'Nigele ayahanapui'.

Yeisu hinage aidiyai iwalo, 'Yau havena hinage alimiyyai yawalowalo mahalava yaiya yana loinena ta teina dova yapaipaihowaine'.

## 12

*Taubada yana tanovi ana taupaihowao  
(Madiu 21:33-46; Luke 20:9-19)*

**1** Yeisu iwalo vegevediyedi, iwalo, 'Ehebo towaho yana tanovi i'umai gileipa a'ava na abwalu ipaihowai, ta gileipa yana abatam ipaihowai, na vada tanovi holanai i'a'abine, eena yana taupaihowao iloinaedi ta hi'ita'ita avivini, na iya ilau'o hali tupwai.

**2** 'Na bada ai'aino ana hauga, ta taubadanane yana hevali ehebo ivetamalei ta ebeha gileipa ainona tanovi ana tau'ita aviviniwo aidiyena ivaidima.

**3** Ilaulau ta nigele hiyamohei, na hesi hi'abi avivini ta hi'aitutuwei, na nimanima a'avana hivetamalei ta iwuwuyone.

**4** 'Taubadanane yana hevali bwauna hinage ivetamalei, ta hinage ilau aidiyai, ta hitalai vahunai, na mayana hinimaya ilalau gwaipilene.

**5** 'Hinage tonugana ivetamalei aidiyai ta hi'oiye mwalowoi. Na hinage bagibagilidi ivetamaleidi aidiyai, ta tupwadi hitalaidi na tupwadi hi'oiye mwalowoidi, na hinage dova bagidagilidi hi'abiye yababadi.

**6** 'Tenem ainai ehebo ta'i imiyamiya, iya natuna moiha, dova hinage ivetamalei aidiyai,

yana nuwatuwu iwalo, “Iya ta'i natugu, mata hive'ahihiyei”.

<sup>7</sup> ‘Ta natunawa imahalava aidiyai, na tau'ita aviviniwo hibom aidiyai hiwalo, “Taubada teina natuna ilalaoma, na ebe ta'oiye mwalowoi, mata tanovi teina maudoina taloina”.

<sup>8</sup> Eeta hi'abi avivini ta hi'oiye mwalowoi, na tanovi ainaena higabae mahalavae.’

<sup>9</sup> Yeisu i'aubabada i'ovi, na ipanivila aidiyai iwalo, ‘Hava mata taubadanane ipaihowai? Moiha taubadanane mata ilaoma yo taupaihowaowa i'oiye mwalowoidi, eena tanoviwa tau'ita avivini vagadi imohedi.’

<sup>10</sup> Yeisu hinage walo vegevegedi Buki Ve'ahihi ainaena iwalo mahalavaei iwalo, ‘Amnuwatuwu avivini Buki Ve'ahihi iwalo mahalava teina dova: “Logidiwa mwalona tau'abi vada hita'wata'wataeiwa, na teina hauga bada hivetowoloya'o yo ivelogidi mugai, na logidi maudoidi inamwanamwa gabaedi.

<sup>11</sup> Teina Yaubada yana paihowa abanuwapanopwano alidai.”

<sup>12</sup> Yeisu yana walo vegevegedi teina taupwaoliwone mwala'idi yo Palisiwone hibenalena'o ta hihanapuiya'o ebeha hiya ta'i vehabadi i'au'aubabadane, ainaede tupwana amwa'amwaha hibehebeha yo ebeha hi'abi avivini, na hesi nigele hiya'abi avivini wuwuna himeheuhi boda aidiyai. Ta hilauvehulu ta hilalaune.

*Sisa yana takesi  
(Madiu 22:15-22; Luke 20:20-26)*

<sup>13</sup> Eeta tautaubadaone tupwadi Palisiwone yo hinage Helodi yana bodao hivetamaledi Yeisu ainai yo ebeha panivilaena hi'oyamaei ta yana lauhapuli hilobai.

<sup>14</sup> Hilaoma Yeisu ainai ta hiwalo, ‘Taubada, bada ahanapuiya'o ebeha owa tauve'ita moiha, na tomowa yadi wahiyala vehabana nigele uyameheuhi, na hesi walomoiha uwalo mahalava ehebo ehebo tomowa maudoidi aidiyai, neta Yaubada yana amwaha uve'ita moiha.

<sup>15</sup> Vedova, howahowana yo Wasawasa Sisa vehabana takesi tamwauwi, bo havena? Na Yeisu yadi oyama bada ihanapuiya'o, ta iwalo, ‘Hava vehabana amtowotowoigaune? Abo hola manenane amvaiyama yo ya'ita.’

<sup>16</sup> Eeta mane siliba ehebo himomoheine. Na Yeisu iwalo, ‘Mane teina ainai yaiya 'alu'aluwana yo yehana?’

Na hiwalo, ‘Wasawasa Sisa’.

<sup>17</sup> Eeta Yeisu iwalo, ‘Ehe dova neta ebe Sisa yana paula ammohe sisa ainai, na ebe Yaubada yana paula Yaubada ammohei’.

Na Yeisu yana walo teina vehabana nuwadi ipwanopwano mwala'ina.

*Taumwalowoi yadi towolouyo  
(Madiu 22:23-33; Luke 20:27-40)*

<sup>18</sup> Hinage Sadusiwone hilaoma Yeisu ainai, hibom nigele hiyayemidi taumwalowoi yadi towolouyo vehabana, ta hipanivila hiwalo,

<sup>19</sup> ‘Taubada, ada loina teina dova Mosese ileleya'o, iwalo, “Ebe ehebo towaho itawahola na nigele natuna na imwalowoi, towahonane tahina

hiwapenane baidana hitawahola, na ebe waihiunane natunao ilabahidi taumwalowoiwa aivelahenao”.

<sup>20</sup> Na aba'ita himohei hiwalo, ‘Ehebo towaho matahinao himiyamiya adi bagibagili hitau 7, na adi tautuwane itawahola, na mulitai mwanenane nigele iyalabalaba na towahonane imwamwalowoine.

<sup>21</sup> Eena hinage tahina vahalinaena hiwapenawa itawaholai, ta hinage dova nigele iyalabalaba na imwalowoi. Hinage tahina vahalinaena hiwapenane itawaholai ta dova nigele iyalabalaba na imwalowoi.

<sup>22</sup> Dova bada tahinao maudoidi hiwapenane hitatawaholaine na himwamwalowoine, na nigele hinage natudiyao; na mulitai hiwapewa imwamwalowoine.

<sup>23</sup> Eeta towolouyo ana haugai waihiunane mata aiteya towaho mwanena moiha? Wuwuna maudoidi bada hitawaholaiya'o.’

<sup>24</sup> Na Yeisu panivila teina iyemaiha, iwalo, ‘Neta yami pwanoli, wuwuna Buki Ve'ahihi nigele amyahanapui, na hinage Yaubada yana wahiyala nigele amyahanapui.

<sup>25</sup> Towolouyo tuluhanai tomowa nigele hiyatatawahola, na hesi yadi miya tausage-nawasaone galewai dova.

<sup>26</sup> Mwalona Yaubada iwalo Mosese ainai towolouyo vehabana, ebe Buki Ve'ahihi amvahili am'ita lobai, hauganane Mosese balabala awawai ilaulau na Yaubada aiwa lohawahawawalina ainaena Mosese ainai iwalo, “Yau Abelaham yana Yaubada, na Aisake yana Yaubada, na Yakobo yana Yaubada”.

<sup>27</sup> Ainaena Yaubada nigele tomowa mwalomwalowoidi yadi Yaubada, na hesi tomowa mayawahidi yadi Yaubada, na omiu hava yami ve'itaone ginauli teina vehabana nigele moihana.'

*Loinao mwala'idi*  
(Madiu 22:34-40; Luke 10:25-28)

<sup>28</sup> Hinage loina ana tauve'ita ehebo ilaoma, ta hiya yadi aubabada Yeisu baidadi ibenalena'o, ta yadi panivila adi maiha Yeisu ainaena ibenaledi'o hinamwanamwa alili, eeta iya hinage Yeisu ainai ipanivila, iwalo, ‘Taubada, loina maudoidi aidiyena aiteya loina mwala'ina?’

<sup>29</sup> Ta Yeisu iwalo, ‘Loina mwala'ina teina: “Omiu Isileliwone yagu walo teina ambenalei neta Yaubada yada Bada ehebo ta'i,

<sup>30</sup> ainaena ada Tauloina Yaubada uvelauwei atem maudoina ainaena na alu'aluwam maudoina ainaena na yam nuwatuwu maudoina na hinage yam wahiyala maudoina aidiyena”.

<sup>31</sup> ‘Na ehebo hinage loina mwala'ina teina, “Am geluwo uvelau aidiyai dova ubom uvelavelauy-oigone”.

‘Loina bwauwone teina loina maudoidi himwala'i gabaedi.’

<sup>32</sup> Loina ana tauve'itawa Yeisu yana walo ibenalena'o, ta iwalo, ‘Taubada, yam walo neta walo moiha, ebeha iya ta'i Yaubada, nigele teya Yaubada iyamiyamiya.

<sup>33</sup> Howahowana tavelavelau ainai ateda maudoina ainaena, na yada nuwatuwu maudoina ainaena, na yada wahiyala maudoina ainaena, na hinage ada geluwo tavelavelau

aidiyai dova ita tavelavelauyoigita. Loina bwauwone mwala'idi, na hesi lagulagu bo ai'ai tapwaopwaoliyedi Yaubada ainai, hiya nigele loina mwala'ina, awa?

<sup>34</sup> Na Yeisu towahonane yana walo ibenalena'o bada moiha, ta aidiyai iwalo, 'Neta walo moiha, na owa Yaubada yana Abaloina vahalinai umamahalava'. I'ovi na tomowaowa Yeisu higagadaei, ta nigele teya iyapanivilauyo ainai.

*Besinana iya Deivida yana huhu  
(Madiu 22:41-46; Luke 20:41-44)*

<sup>35</sup> Mulitai Yeisu vada tapwalolo mwala'ina holanai ive'ive'ita tomowa aidiyai ta iwalo, 'Vedova ta tupwana loina ana tauve'itao hiwalo ebeha Deivida tubunao ainaena Besinana towahona ilalaoma.

<sup>36</sup> Mwalona vehabana Alu'aluwa Ve'ahihi Deivida ive'ita, eeta Deivida Besinana i'awa Bada ainai, iwalo:

"Yaubada iwalo yagu Bada ainai,  
'Nima tautuwaguwena umiya ana higa am alehao  
yamwau aituluwed aem elauhanai' ".

<sup>37</sup> Deivida iya Besinana i'awa badaei, vedova yede ta Deivida tubuna ainaena mulitai abo Besinana ilaoma?' Na boda maudoidi Yeisu yana ve'ita nuwadi ivai.

*Yeisu loina ana tauve'itao i'awa yababaedi  
(Madiu 23:1-36; Luke 20:45-47)*

<sup>38</sup> Yeisu hinage aidiyai iwalo, 'Havena loina ana tauve'itao yadi mumuga ammulimulitaei, wuwuna hiya yadi laulau ta'i nuwanuwadi yo adi ale'owo daodaodi hili'wali'wadi na tomowa

ahi'ahipudiyai hita'ita'i ili ta ebe hiwalo vetuve-haedi.

<sup>39</sup> Na hinage nuwanuwadi abamiya namwanamwadi vada tapwalolo aidiyai yo hinage guyau adi hauga aidiyai nuwanuwadi yo vatavatai himiyamiya.

<sup>40</sup> Na hinage tomowa mehediya Yaubada ainai yadi awanoi daodaodi, na hesi yadi awanoine nigele namwanamwana, wuwuna atediyai hinuwanuwatuwu vedova mata hiwahiwapewo hi'oyamaedi, yo yadi tobwatobwa hivaidi. Ainaena howola abo Yaubada maiha yababana imohedi.'

*Hiwape yana velau*

(Luke 21:1-4)

<sup>41</sup> Multai Yeisu velau ana abamwau vahalinai imiyamiya, na wasawasao bagibagilidi yadi velau mwala'idi i'ita'itadi.

<sup>42</sup> Na hinage hiwape wewelohena i'iitane yana velau toea bwau a'ava imwamwauwine.

<sup>43</sup> Eeta Yeisu ana taumulitao iyoga ahaidima, ta aidiyai iwalo, 'Tenem, hiwapene yana velau maudoidi yadi velauwo imwala'i gabaedi.

<sup>44</sup> Wuwuna hibom yadi tupwao mwala'ina himiyamiya, na hesi hiwape tenem wewelohenane yana mane maudoina imwauwiya'o, ta nigele hinage teya yana tupwa iyamiyamiya ebe ainaena ana igimwala.'

## 13

*Hauga vitaina howola abo imahalava*

(Madiu 24:1-14; Luke 21:5-19)

<sup>1</sup> Yeisu mayana taumulitao vada tapwalolo mwala'ina ainaena himalava, na ana taumulita ehebo ipanivila, iwalo, 'Taubada, u'ita vadao teina adi paihowa namwanamwa alili, gaima mwala'idi aidiyena hi'a'abidine'.

<sup>2</sup> Na Yeisu iwalo, 'Vadaone mwala'idi u'i'itadine mata maudoidi hilo'elo'edi na nigele teya tupwa uya'itauyoi'.

<sup>3</sup> Multai Yeisu ilau Olibe oyana ainai na italu-miyahiwa, na ainaena vada tapwalolo Yelusalem ainai ivinuvununu, na Pita, Yemesa, Yoni yo Andulu hilaoma ta hibom Yeisu baidadi, hiwalo auli hiwalo,

<sup>4</sup> 'Taubada, uwalo auligai aiteya hauga ainai vada tapwalolo mwala'ina hilo'e na aiteya ve'ive'ilala aidiyena ahanapui ebeha ginauliwone mata himahalava?'

<sup>5</sup> Eeta Yeisu i'apuhini, yo aidiyai iwalo mahalava ta iwalo, 'Am'ita avivinigomiu, havena tomowa tupwadi hi'oya'oyamaegomiu.

<sup>6</sup> Wuwuna howola abo tomowa bagibagiliyi yehaguweni hilalaoma na ebeha oyamaena himugaiyegomiu, ta ehebo ehebo aidiyena hiwalo, "Yau Besinanananane", na tomowa bagibagiliyi himulitaedi.

<sup>7</sup> Hinage wasa abo ambenaledi alehao vahalimiyai na amwaha daodaowai hibom hi'ale'alehauyoidi, havena am'alu'aluvagavaiyedi. Ginauliwone teina moiha ta'i mata himahalava mugai, na hesi bale'u yana aba'ovi ana hauga howola alili.

<sup>8</sup> Howola abo vali boda yo vali boda hi'aleha, na hinage vali abaloina yo vali abaloina hi'aleha,

na hinage mwani'ini'i hisagena tupwa bagibag-ilidi aidiyai, yo hinage vahali mwala'ina himahalavama. Na ginauliwo teina hauga vitaina ana abavetuwanu ta'i.

**9** 'Na omiu hesi am'ita avivinigomiu, mata tomowa hi'abi avivinigomiu, yo hilawegomiu lauvetala vehabana, yo vada tapwalolo aidiyai abo hisapigomiu, na hinage mata tauloinao yo tauwasawasawo mehediyai hilawegomiu yo amtowolo na hilauvetalaegomiu. Wuwuna omiu ebeha yagu bodo, yo hinage wasagu aidiyai amwalo mahalavaei.

**10** Mata wasa namwanamwana hiwalo mahalava mugaiyei tupwa maudoina aidiyai, na mulitai abo hauga yana aba'ovi.

**11** 'Na ebe tauloinao mehediyai hivetowologomiu habi lauvetala havena am'alu'aluwagavai vedova mata am'aubabadane, na hesi mayami atepatu am'aubabada ta'i, wuwuna nigele ebeha omiu yami walo am'aubabadaei, na hesi Alu'aluwa Ve'ahihi hauga tenem ainai walo imohegomiu, yo am'aubabada.

**12** 'Na hinage hauga hilalaoma aidiyai tomowa yadi huhu holanai aleha himahalava vehabagu, neta towaho tahina ihuhulaei yo hiyemwalowoi. Yo hinage dova tama natuna ihuhulaei yo hiyemwalowoi. Yo hinage hedaheda hinadiyao yo tamadiyao hihuhulaedi yo hiyemwalowoidi.

**13** Yo tomowa maudoidi hive'alehaegomiu wuwuna omiu ebeha agu tauyemidiwo. Na hesi yaiyadiwo omiu vehabagu am'alama'i'ita ana higa hauga yana aba'ovi ainai, mata omiu ta'i awanamwanamwa amlobai.

*Vitai mwala'ina*  
*(Madiu 24:15-28; Luke 21:20-24)*

**14** 'Howola abo omiu am'ita tomowa vagadiyao ginauli yababana na didigana moiha hivetowolodi tupwa ve'ave'ahihina ainai (ebe yaiya walo teina ivahili ihanapui), hauga tenem ainai Yudeya ana taumiyaone howahowana ebe hidena oya.

**15** Na ebe yaiya vatavatai imiyamiya, howahowana idena mwayamwayau, na havena iluwuluwuyo yana vadai yana tobwatobwa habi avalaidi.

**16** Yo ebe yaiya tanoviyai ipaipaihowa, havena iwuyowuyo ana ale'owa ilaugabaeiwa vehabana.

**17** 'Hauga tenem ainai tauhiumao yo tauve-huhuwo mata hive'atemuyamuya.

**18** Eeta maudoimiu am'awa'awanoi yo hauga namwanamwana Yaubada imohegomiu yami hauga dena ainai, na havena gwaugwau ana haugai.

**19** 'Ehe, hauga tenem ivitai ali'alili, wuwuna hauganane Yaubada bale'u ivetuwni ainaena ta wau nigele teya hinage vitai tenem dova iyamahalava, na hauga hilalaoma aidiyai mata nigele teya vitai teina dova hiyamahalavauyo.

**20** Vitai tenem ana ahubenao ebe nigele Yaubada iya'abiye ahugalidi, mata tomowa maudoidi himwalowoi, na hesi Yaubada ahubenadine i'abiye ahugalidiya'o, neta iya yana tomowa ve'ave'ahadi vehabadi.

**21** 'Tenem haugana ainai ebe yaiya alimiyyai iwalo, "Besinana teina", na "tenem", havena amyemiyemidiyei.

**22** Wuwuna Besinana oya'oyama yo tauwalo mahalava oya'oyama mata himahalava yo ve'ive'ilala wahiwahiyaladi tomowa aidiyai hive'itaedi, yo aidiyena ebe howahowana Yaubada yana bodoa ve'ave'ahadi hi'oyamaedi.

**23** Na omiu hesi am'ita avivinigomiu, wuwuna ginauliwone teina vehabadi bada yawalo mahalava mugaiyedi'o alimiayai.

*Yeisu yana wuyoma*

(*Madiu 24:29-31; Luke 21:25-28*)

**24** 'Hauga vitaisha i'ovi na mulitai mahana iguguyou, yo hinage wai'ena yana masele iboho,

**25** na utui galewaena hibe'uma yo ginauli maudoidi galewai himiyamiya yadi wahiyala hitapiya.

**26** 'Hauga tenem ainai taumiya bale'uwone maudoidi yau Tomowa Moihagu hi'itagau yaloyalovi aidiyena ya'ai'aituluma mayagu loina wahiyalana yo mayagu wasawasa pigapigabuna,

**27** eeta yagu tausagenawasaone yavetamaledi yo yagu boda ve'ave'ahadi hitau'ahaidima bale'u yo galewa yo yaumai maudoidi yadi abalaoma aidiyena.

*Aba'ita hapelo ainaena*

(*Madiu 24:32-35; Luke 21:29-33*)

**28** 'Aba'ita hapelo ainaena yave'itagomiu. Ebe hapelo lugudi vauvaudi imwaumwauwidi amhanapuiya'o ebeha ehive ana hauga vahalinai.

**29** Ta hinage ve'ive'ilalaowa alimiayai bada yawalo mahalavaedi'o, ebe aiteya hauga amlobaidi amhanapuiya'o ebeha yagu hauga wuyoma imamahalava.

**30** Yawalo moiha alimiayai, yaso teina mata nigele amya'ovi ana higa ginauliwone maudoidi himahalava.

**31** ‘Howola abo galewa yo bale'u hisawali, na yagu walowone nigele howahowana hisawali.

*Yana laoma ana hauga nigele tauhanapuina  
(Madiu 24:36-44)*

**32** ‘Nigele teya yaiya iyahanapui aiteya hauga nuwana ahubena ainai yawuyouyoma, na hinage tausagenawasaone galewai nigele hiyahanapui. Yau hinage nigele yayahanapui. Na hesi Tamagu ibom ta'i ihanahanapui.

**33** Eeta am'ita avivini wuwuna yagu hauga wuyouyoma nigele amyahanapui.’

**34** Aba'ita hinage Yeisu imohedi iwalo, ‘Ebe ehebo taubada yana vada habi laugabaina yo ilalau vali tupwai. Mulitai abo ilau, yana taupai-howao ehebo ehebo yadi paihowa imohedi, na iloinaedi yo ebeha yana vada hi'ita avivini, na hinage vada ana awa'eda ana tau'ita avivini ainai iwalo, “Havena u'eno'eno, na hesi u'ita'ita avivini ili'ilimani”.

**35** Eeta howahowana am'ita'ita avivini yo amha'waha'waigau, wuwuna dova vada taniwagana yana laoma ana hauga nigele amyahanapui, nuwana lavilaviyai, nuwana boniyaiyena, nuwana i'ahu'ahubena, nuwana malatomtomwena.

**36** Havena am'eno'eno, mata dova ta yama-halavama na yave'aluwa gavaigomiu.

**37** ‘Yagu loina teina omiu alimiayai na tomowa maudoina aidiyai, am'ita avivini ili'ilimani.’

## 14

*Babadao nuwanuwadi yo Yeisu hi'oixe  
mwalowoi*  
*(Madiu 26:1-5; Luke 22:1-2; Yoni 11:45-53)*

<sup>1</sup> Buidi'wa guyauna ana abanuwatuwu avivini ebe imahalava, ahubena bwau tuluhadiyai. Guyaunane ainai pwalawa a'ava, nigele ana abiye seseha hi'ai'ai. Na taupwaoliwo mwala'idi yo loina ana tauve'itao hinuwanuwatuwu behabeha vedova Yeisu ebe hi'oyamaei yo ebeha hi'abi avivini na hi'oixe mwalowoi,

<sup>2</sup> na hiwalo, 'Havena guyaune holanai Yeisu ta'abi'abi avivini, mata dova ta tomowa himanini alidai na hi'alehaegita'.

*Waihiu Yeisu iyewoloi dalava Betani ainai*  
*(Madiu 26:6-13; Yoni 12:1-8)*

<sup>3</sup> Yeisu howola Betani ainai imiyamiya Saimoni yana vadai, iya mwalona taulepelo ehebo. Na hauganane ainai Saimoni yana vadai i'ai'ai, eena waihiu ehebo mayana woloi iluwu, ta woloinane yehana nadi, ana maiha mwala'ina, na ana gaimapatu namwanamwana moiha, na waihiunane gaimapatu awana i'oiwowoli na woloinane Yeisu vahunai ihihiwaine.

<sup>4</sup> Na tupwana tomowa hi'i'itane, ta waihiune hi'ulumiyanai, hiwalo, 'Hava vehabana woloine iyepaipaiheine?

<sup>5</sup> Howahowana ebe woloinane ivesgimwalaei na ana maiha 300 kina dova ivai, na imohedi wewelohe aidiyai.' Eeta waihiunane hiwawaloweine.

<sup>6</sup> Na Yeisu iwalo aidiyai, iwalo, 'Badagi, amlaumwau. Havena waihiune am'abi'abiye dou,

wuwuna yana hagu aliguwai inamwanamwa alili.

<sup>7</sup> Wewelohewone amwalowalowedine hauga maudoina vahalimiayi himiyamiyane, yo ebe nuwanuwamiu aiteya hauga na amhaguidi, amhaguidi ta'i. Na yau hesi nigele mata hauga daodaona baidamiu tayamiyamiya.

<sup>8</sup> Na waihiu teina hava dova ipapaihowaine aliguwai, neta taugu ivewoloi mugaiyei habi atububunigau agu mwau magaiyai vehabana.

<sup>9</sup> Na yawalo moiha, howola abo wasagu ana guguya tomowa hibenalei bale'u maudoina ainai, na hinage waihiu teina yana paihowa aliguwai wasana hi'aubabadaei.'

*Yudasa yana talam Yeisu ana huhula vehabana  
(Madiu 26:14-16; Luke 22:3-6)*

<sup>10</sup> Yeisu ana taumulita ehebo hitau 12 aidiyena iya Yudasa Isakaliyota, ilau taupwaoli mwala'idi aidiyai na nuwanuwana na Yeisu aidiyai ihuhulaeli.

<sup>11</sup> Na Yudasa yana walo hibenalena'o, ta hiyaliyaya na ainai hiwalo yemidi yo ebe ana maiha himohei. Eeta Yudasa hauga namwanamwana iha'waha'wai, ta ebe Yeisu ihuhulaeli aidiyai na hi'abi avivini.

*Yeisu mayana taumulitao hi'ai'ai  
(Madiu 26:17-25; Luke 22:7-14; Yoni 13:21-30)*

<sup>12</sup> Buidi'wa guyauna holanai pwalawa a'avana nigele ana aba'abiye seseha hi'ai'ai, na guyaunane ana ahubena mugamugaina ainai, lamiwo hiwunuidi, Buidi'wa ana abanuwatuwu abivini vehabana. Na ahubenanane ainai Yeisu ana taumulitao hiwalo auline, hiwalo, 'Taubada,

havaidova ainai nuwanuwam yo Buidi'wa guyauna vehabana a'atububuni?’

<sup>13</sup> Eeta ana taumulitao bwau ivetamaledi na iwalo aidiyai, ‘Amlau Yelusalem yo ebe towaho ehebo mayana abagoi we'aha i'ava'avalai amlobai towahonane tuluhanaena amlau,

<sup>14</sup> yo baidamiu amluwu vada, na vada taniwagana amwalo ainai, amwalo, “Yama tauve'ita teina dova iwawalone: Aiteya tupwa utalamwei yo ainai ma'agu taumulitao Buidi'wa ai'aina a'ai?”

<sup>15</sup> Ta mata tupwa atu'atububunina ewai ive'itagomiu, na tenem ainai Buidi'wa ai'aina am'atububuni vehabada.’

<sup>16</sup> Eeta taumulitaone hilau dalava Yelusalem ainai, na hava Yeisu dova ginauli iwawalowediwa maudoidi hilobaidi, na vadanane ainai Buidi'wa ai'aina hi'a'atububunine vehabadi.

<sup>17</sup> Na lavilaviyena Yeisu mayana taumulitao hilaoma,

<sup>18</sup> na hitau 12 himiya habi ai, na yadi aine holanai Yeisu iwalo aidiyai, ‘Augeluwo, yawalo moiha neta ehebo towaho, teina ta'i baidada ta'ai'aine, mata iya muhamuhana ihuhulaegau’.

<sup>19</sup> Na Yeisu yana walo teina vehabana hinuwavaitai na ehebo ehebo Yeisu ainai hiwalo, ‘Taubada yaiya neta? Nuwana yau?’

<sup>20</sup> Na Yeisu iwalo, ‘Agu tauhuhulane omiu amtau 12 alimiyyena, na iya baidagu gaeba ehebo ainaena a'ai'ai.

<sup>21</sup> Yau Tomowa Moihagu, howola abo yalau amwahanane mugai Buki Ve'ahihi ainai iwalo mahalavaina'o, na hesi agu tauhuhulane

ive'atemuyamuya ta'i, inamwananwa ebe mwalona hinana havena ilabalabahi, wuwuna yana tubui ainaena ive'atemuyamuya yana paihowa yababana vehabana.'

*Yeisu yana ai*

(*Madiu 26:26-30; Luke 22:15-20; 1 Kolinita 11:23-25*)

<sup>22</sup> Howola hi'ai'ai, na Yeisu ai'ai ivai, na vehabana i'awa yauwedo, ta itomwahi na imomochedine, iwalo, 'Teina taugu amvai na am'ai'.

<sup>23</sup> Na hinage waini mavedina ivai, ta vehabana i'awa yauwedo Yaubada ainai, na hinage imomochedine, ta maudoidi hinunumane.

<sup>24</sup> Na hinage iwalo aidiyai, 'Teina 'wahinagu isagesagena tomowa bagibagilidi vehabadi, neta waloyemidi vauvauna.

<sup>25</sup> Na yawalo alimiyai hauga teina yo tuluhanai waini teina havena ainaena yanumanumauyo na ana higa waini vauvauna yanuma Yaubada yana tupwai.'

<sup>26</sup> Eeta wali ehebo hiwaliyei i'ovi na himahalava ta hihae oya Olive ainai.

*Yeisu iwalo mahalava Pita yana uvala vehabana*

(*Madiu 26:31-35; Luke 22:31-34; Yoni 13:36-38*)

<sup>27</sup> Yeisu iwalo aidiyai, 'Mata maudoimiu amdena vehulugau, dova Buki Ve'ahihi yana walomahalava, iwalo, "Tau'ita'ita sipi ya'oilye mwalowoi, na sipiwone hitaubudebudeyanaedi".

<sup>28</sup> Na yagu towolouyo tuluhanai Galili ainai yalau, na omiu tuluhaguwena abo amlaowa.'

<sup>29</sup> Na Pita iwalo, ‘Mata maudoidi hitauvehulu, na yabom baidam’.

<sup>30</sup> Na Yeisu Pita iwalo ainai, ‘Yawalo moiha, mata masigiliyena mulitai abo am'am idou mai bwau, owa mata uuvalaegau mai tonuga’.

<sup>31</sup> Na Pita mayana walo wahiyala iwalo, ‘Taubada, mata nigele yayaualavaego. Ebe hi'oiye mwalowoigo yau hinage baidam hi'oiye mwalowoigita’. Taumulitao maudoidi dova hi-wawalone.

*Yeisu Getesemani ainai i'awa'awanoi  
(Madiu 26:36-46; Luke 22:39-46)*

<sup>32</sup> Mulitai hilalaune ehebo tupwa ainai, yehana Getesemani, na ana taumulitao aidiyai iwalo, ‘Teina ainai ammiyamiya, na yau ya'awanoi Yaubada ainai’.

<sup>33</sup> Na hitau tonuga baidanao ilalauvaidine, hiya Pita yo Yemesa yo Yoni, na Yeisu mayana ate-hawawali na mayana nuwavita,

<sup>34</sup> iwalo aulidi iwalo, ‘Ategu imuyamuya mwala'ina, nuwana mata yamwalowoi, eeta teinai amha'waha'wa na am'ita'ita auhi.’

<sup>35</sup> Na Yeisu iwutuhae tupwana, na ibe'u aitulu ta i'awa'awanoi ebe howahowana muya teina Yaubada ivaivehulu,

<sup>36</sup> iwalo, ‘Tamagu, paihowa maudoina howahowam, nuwanuwagu yo muya vedina teina aliguwena uvaivehulu, na havena yau yagu nuwatuwuwena, na owa hesi yam nuwatuwuwena upaihowai’.

<sup>37</sup> Hauganane ilau gwaipile hitau tonugaowa ilobaidi bada hi'eno i'iwhahi'o, na Pita ainai iwalo,

'Saimoni, vedova ta u'eno'enone. Nigele howahowana na hauga ahu'ahubalina ainai u'ita'ita auhi awa?'

**38** Na hinage iwalo maudoidi aidiyai, 'Howahowana ebe mehemiu hihilahilawa na am'awa'awanoi, ta ebe havena Tomodulele itowotowoigomiu. Moiha ta'i, alu'aluwamiu nuwanuwana, na hesi taumiui hitapiya'.

**39** Na Yeisu iheuyo ta yana awanoiwa ibwabwauwine.

**40** Haugana Yeisu ilau gwaipile ana taumulitao aidiyai, hinage ilobaidi hi'eno i'iwahi'o, wuwuna mehedi bada i'eno'eno alili, eeta ivanoidi, ta hitowolo mayadi hinimaya, na nigele hava hiyawalowell.

**41** Na Yeisu hinage iheuyo ta i'awanoi, na yana wuyoma tonugana ainai ilobaidi hi'eno i'iwahi'o ta iwalo aulidi, 'Vedova howola am'eno'eno na am'ai'aiyawasi, awa? Na am'ita yau Tomowa Moihagu yagu hauga huhula tauyababao aidiyai bada imahalava'o.

**42** Amtowolo na talau, wuwuna agu tauhuhulawa bada teina ilalaoma.'

### *Yeisu ana abi'avivini*

(*Madiu 26:47-56; Luke 22:47-53; Yoni 18:2-12*)

**43** Yeisu howola i'au'aubabada na Yudasa imamahalavane, (iya Yeisu ehebo ana taumulita hitau 12 aidiyena). Na taupwaoliwo mwala'idi yo loina ana tauve'itao yo babadao tau'alehao hivetamaledi Yudasa baidadi ta ebe Yeisu hi'abi avivini, na tau'alehaone mayadi elepa ale'aleha yo wepwasiwo hilalaomane.

**44** Na Yudasa bada ve'ive'ilala imohedi'o, iwalo, 'Ebe yaiya ya'atuhapwali neta Yeisu, na am'abi avivini na am'ita avivini yo talawei'.

**45** Eeta Yudasa ilaoma Yeisu ainai na iwalo, 'Bada', na i'a'atuhapwaline.

**46** Ta tau'alehauwa hilaoma na Yeisu hi'a'abi avivinine.

**47** Na ehebo aidiyena Yeisu vahalinai itowotowolo yana elepa ale'aleha iniuli wunihi, ta taupwaoli mwała'ina yana taupaihowa talinana itom vehulune.

**48** Na Yeisu iwalo aulidi, iwalo, 'Vedova yau yami tau'aivavali, ta mayami elepa ale'aleha yo mayami wepasi amlalaomane habi abimomohigau?

**49** Hava wuwuna ta nigele amya'abi avivinigaune ahubena maudoina ahi'ahipumiyyai yamiyamiya vada tapwalolo ainai yave'ive'ita tomowa aidiyai? Eeta ginauli teina himahalava'o na ebe Buki Ve'ahihi yana walomahalava iyemala moiha.'

**50** Hauganane ainai Yeisu ana taumulitao maudiodi hidena vehulu.

**51** Na ehebo towaho hevahevalina ma'ana ale'o daodaona ibom Yeisu imumulitaeine, na tau'alehao nuwanuwadi hi'abi avivini,

**52** na hi'abihapuli ta ana luwuluwu a'ava hivai na mabugebugewana idedenane.

### *Yeisu hilawei tauloinao aidiyai*

*(Madiu 26:57-68; Luke 22:54-55, 63-71; Yoni 18:13-14)*

**53** Yeisu hilauvai ta hilawei taupwaoliwo yadi tauloina yana vadai, vadanane ainai taupwaoli

mwala'idi yo babadao, yo loina ana tauve'itao hitautau'ahaiyama.

<sup>54</sup> Hinage Pita amwaha daodaowena Yeisu imumulitaeine, ta ilaoma taupwaoli mwala'inawa yana dalavai. Ta Pita tau'ita aviviniwowa baidanao himiyamiya aiwa ainai himwaimwaibwa.

<sup>55</sup> Na taupwaoli mwala'idi yo tau'ulewahiwo nuwanuwadi Yeisu ana tauve'ewao hibehaedi ta yadi ve'ewa ainaena Yeisu hi'oiye mwalowoi, na nigele teya hiyalobai.

<sup>56</sup> Wuwuna tauve'ewa bagibagilidi hiwalowalo mahalava na hesi yadi walomahalavane nigele hiyatoyatoyawa. Hiya maudoidi bada tau'oyamao.

<sup>57</sup> Na tupwadi hitowolo ta Yeisu hive'ewa oya'oyamaei, hiwalo,

<sup>58</sup> ‘Yeisu yana walo ehebo abebenaleine iwalo, “Vada tapwalolo teina tomowa hi'aabine, howola mata yalo'evehulu na ahubena tonuga aidiyai ya'abiuyoi, na hesi nigele tomowa nimadiyena”.’

<sup>59</sup> Na yadi ve'ewao ginauli teina vehabana, nigele hiyatoyatoyawa.

<sup>60</sup> Teina ainaena taupwaoli mwala'ina itowolo mehediysi, na Yeisu ipanivilaei iwalo, ‘Nigele teya yam maiha awa? tomowa tenem yadi ve'ewao alimwai bada ubenaledi'o?’

<sup>61</sup> Na Yeisu bada inobu, nigele iyawalo. Na hinage taupwaoli mwala'inawa Yeisu ainai ipanivilauyo, iwalo, ‘Vedova, owa Yaubada Natuna yo Besinana towahona, bo nigele?’

<sup>62</sup> Na Yeisu iwalo, ‘Ehe, yau Tomowa Moihagu, na howola abo am'itagau Tauwahiyala moiha

nima tautuwana'i yamiyamiya, na hinage galewa yaloyalovinao ewadiyena yalaolaoma'.

**63-64** Eeta taupwaoli mwala'inawa imodi'ini moiha, ta ibom ana ale'o ipupulihine, na iwalo, 'Yana walo yababana ambenalena'o? Moiha towaho teina Yaubada ihinali. Badagi, havena ana tauve'ewao hinage hiwalowalo yana lauhapuliwo vehabadi. Na vedova yami nuwatuwu Yeisu vehabana?' Maudoidi hiwalo, 'Ilowoinanei na imwalowoi'.

**65** Tenem ainai tupwadi tomowa Yeisu hihowai, na mehena ale'owena hihuma na hisapi mayadi talawahi, hiwalo, 'Uwalo yaiya itatalaigone?' Na tau'alehaone Yeisu hi'abi avivini ta hitalatalai na hilawelawei.

**66** Na Pita howola gelegeleyai imiyamiya, na taupwaoli mwala'ina yana taupaihowa vahavalana ehebo imamahalavane,

**67** ta Pita i'ita imwaimwaibwa, eeta waihiune Pita ivinuvinunui ta iwalo, 'Yeisu towaho Nasaleti, owa baidam ammiyamiya, awa?'

**68** Na Pita iuvala iwalo, 'Ginauline uwawaloweine nigele yayahanapui'. Na Pita idena ta tupwana imahalava.

**69** Na vahalawa Pita i'ainimaveleleyei tau-miyaone aidiyai, iwalo, 'Towahone tenem iya Yeisu yana boda ehebo'.

**70** Na Pita ibenalei ta iuvalauyo iwalo, 'Yau nigele'.

Hauga ubwa'ubwana tuluhanai tauvinunuwone Pita hiwawalo auline, hiwalo, 'Moiha ta'i u'oyama, owa Yeisu yana boda ehebo, wuwuna owa towaho Galili'.

**71** Na Pita i'awa tamada, na walo yababana ainaena iyogahae iwalo, ‘Yeisu iya vehabana amwalowalo, yau nigele yayahanapui, Tamada!’

**72** Na hauga tenem ainai am'am idou bwauna, na Pita inuwatuwu avivini Yeisu yana walowa ebeha, ‘Mulitai abo am'am idou mai bwau, owa mata uuvalaegau mai tonuga’. Na hinage Pita yana oyama yababanawa inuwatuwui, ta mehe-linona hisagena.

## 15

*Yeisu yana lauvetala Pailato mehenai*

(*Madiu 27:1-2, 11-14; Luke 23:1-5; Yoni 18:28-38*)

**1** I'ahu'ahubena na taupwaoliwo mwala'idi yo tau'ulewahiwo yo loina adi tauve'itao yo tauloinao maudoidi hitau'ahaiyama ta hiloiloina Yeisu vehabana, na nimana hipaidi ta hilalaweine tauloinane Pailato ainai, ta ebeha Pailato iya iloina.

**2** Na Pailato Yeisu ipanivilaei, iwalo, ‘Uwalo mahalava owa Yudeya yadi tauwasawasa?’

Na Yeisu iwalo ‘Neta bada uwalo'o’.

**3** Ta taupwaoli mwala'idiwa ginauli bagibagli-lidi vehabadi Yeisu hiveve'ewaine.

**4** Eeta Pailato Yeisu ipanivilauyoi, iwalo, ‘Vedova ta nigele yam maihane? Walo mahalava teina, am ve'ewa vehabana ubenalena'o?’

**5** Na Yeisu nigele teya hinage yana walo. Ainaena Pailato nuwana ipwanopwano mwala'ina.

*Hiloina ebe Yeisu hi'oiye mwalowoi  
 (Madiu 27:15-26; Luke 23:13-25; Yoni 18:38-19:16)*

**6** Bolimai ehebo ehebo, Buidi'wa guyauna ana hauga ainai, loina himwauwi neta vada paipaiyena ehebo tomowa ilivahi vehabadi na imahalava, ebe iya boda hivesinuwaei.

**7** Hauga tenem ainai tupwadi Loma adi tau'alehao vada paipaiyai himiyamiya, wuwuna nigele nuwadi Loma yadi loina, ta hi'alehaidi, na ehebo yehana Balabasi alehane holanai tomowa i'oiye mwalowoidi. Eeta Lomaone Balabasi ma'ana geluwo hi'abi avivinidi ta vada paipaiyai himwamwauwidine.

**8** Ta boda hitau'ahaiyama, na hi'awanoi Pailato ainai, hiwalo, 'Howahowana yo ehebo towaho ulivahi vahabamai, dova yama awanoi upaipaihowai bolimai ehebo aidiyai?'

**9** Na Pailato iwalo aulidi, 'Nuwanuwamiu ebe Yudeyaone yami tauwasawasa yalivahi vehabamiu, awa?'

**10** Wuwuna Pailato ihanapuiya'o ebeha taupwaoli mwala'idi yadi alomagigiliyena Yeisu hilavaiyama habi oyemwalowoina.

**11** Na hesi taupwaoli mwala'idi bada tomowa nuwatuwu yababadi hivenuwamwauwedi'o aidiyai, ainaena Yeisu hita'wata'wataei na Balabasi hesi yehana hi'ata'atai na ebe ilivahi vehabadi.

**12** Na Pailato iwalo aulidi iwalo, 'Hava nuwanuwamiu ebeha omiu Yudeya yami tauwasawasa ainai yapaihowai?'

**13** Na hilohagali, hiwalo, ‘Aiwa lagalagana ainai tatutuye patu!’

**14** Na Pailato iwalo, ‘Hava yede yana pwanoli ta ebe mwallowo ilobai?’

Na hiyoga mwalamwala'i, hiwalo, ‘Aiwa lagalagana ainai tatutuye patu’.

**15** Eeta Pailato nuwanuwana yo boda i'abiye yaliyayadi ta Balabasi ilivahi, na yana tau'alehao iloinaedi yo Yeisu balavaiyena hisapi na mulitai abo hitutuye patu aiwa lagalagana ainai.

*Tau'aleha Yeisu hi'abitlawahiyei  
(Madiu 27:27-31; Yoni 19:2-3)*

**16** Pailato yana tau'alehao Yeisu hisapi na hilauvai ta yana vadai hiluluwuweine, neta tau'alehao yadi tupwa mwala'ina vada holanai, na tau'alehao yadi boda maudoidi hiyoga ahaidima. **17** Na wasawasao adi ale'o hawahawawalina ainaena Yeisu hiveveli'wane na ana pwaopwaomi talitali ainaena hi'abilawei ta ulu'ulunai himwamwauwine.

**18** Na hi'abi'abitlawahiyei hiwalo, ‘Yauwedo, owa Yudeya yadi tauwasawasa!’

**19** Na hinage digona ainaena Yeisu vahunai higoha, na hihowahowai, na talawahiyena mehenai hipwagogo.

**20** Na yadi talawahi i'ovi, ta ale'o wasawasa ainaena hilivahi, na ibom ana ale'owa hivel'i'wauyoi, na himahalavaei habi tutuye patuna.

*Yeisu hitutuye patu aiwa lagalagana ainai  
(Madiu 27:32-44; Luke 23:26-43; Yoni 19:17-27)*

**21** Dalava mwala'ina ainaena himahalava, ta ehebo Sailini towahona nu'ulaena ilaolaoma

hilobai, ta hiloinaei na Yeisu ana aiwa lagalagana i'avalai, towahonane yehana Saimoni, na iya Alekisana yo Luposi tamadi.

**22** Yeisu hilalaweine tupwa Goligota ainai (Goligota ana hanapu neta Ulu'ulu dalavana).

**23** Na mulamula himomoheine, neta waini mulo baidana yo ebe havena muya ilaulautowoi mwala'ina, na Yeisu ita'wata'wataei.

**24** Eeta aiwa lagalagana bale'uwai himwauwi na Yeisu ainai hitutuye patune, na ma'ana aiwa lagalagana hivetowlone. Multai tau'alehaowa Yeisu ana ale'o hivaidi, ta hiveguyauwedi hibom aidiyai, na yadi veguyau dova kati ana ai'opi'opi ainaena, ta ebe yaiya imugai ana ale'o ehebo ivai.

**25** Haugana Yeisu hitutuye patu neta malatomtom ana ahi'ahipu ainai.

**26** Na ana aiwa lagalagana ainai hilelelene, 'Yudeya yadi tauwasawasa'. Neta yana mwallowoi wuwuna.

**27-28** Na hinage tau'aivavali bwau hitutuye patudi adi aiwa lagalagao aidiyai ehebo Yeisu nimatautuwanaena na ehebo nima'eha'ehanaena.

**29** Na tomowa tupwadi amwahaena Yeisu aiwa lagalagana ainai hi'abitalawahiyei, na himalumaluwei hiwalo, 'Aha! Uwalo ebeha howahowam vada tapwalolo ulo'e, na ahubena tonuga aidiyai u'abiuyoi.

**30** Hola uhaguiyoigo na aiwa lagalaganaena u'aituluma.'

**31** Na hinage taupwaoli mwala'idi yo loina ana tauve'itao hibom aidiyai hiwalowalo gagasa, na Yeisu hitalawahiyei hiwalo, 'Vali tomowa ih-aguidi, na iya nigele!

**32** Ibom ebeha Besinana na Isileli ana tauwasawa, hola aiwa lagalagaena i'aituluma na ta'ita yo tayemidiyei.'

Na tau'aivavaliwowa Yeisu baidadi hitutuye patudiwa hinage yadi aiwa lagalagaena hiogalau na Yeisu hiwalo yagai.

*Yeisu imwalowoi*

(*Madiu 27:45-56; Luke 23:44-49; Yoni 19:28-30*)

**33** Mahana ala'alapwahiyai, tupwa maudoina iguguyou ta ana higa lavilaviyai.

**34** Na lavilaviyai Yeisu alinana mwala'ina ainaena iyoga, na iwalo, 'Eloi, eloi lama sabakitani', na ana bui neta, 'Yagu Yaubada, yagu Yaubada, hava vehabana ulaugabaigaune?'

**35** Na tupwadi tomowa vahalinai hitowotowolo yana yoga hibenalei, ta hiwalo, 'Ambenalei Elaitiya iyogayogaeine'.

**36** Eena ehebo aidiyena isagen, ta balou ivai, na waini abe'abelena ainai iveda'wa, na ehebo aiwa mehenai iwomali, ta iveleleihini Yeisu awanai, ta imala'u'uine. Na towahonane iwalo, 'Hola taha'waha'wa, nuwana mata Elaitiya ilaoma na aiwa lagalagaena ihagui'.

**37** Na Yeisu iyoga mwala'ina, ta yawahina i'o'ovine.

**38** Na ale'owa vada tapwalolo ana biliwutuhi ilotapulihi bwau, ewanaena ta idobi duyanai.

**39** Na tau'aleha adi taumugai aiwa lagalagana mehenai itowotowolo Yeisu yana mwallowoi ana ita teina dova i'i'itane, ta iwalo, 'Moiha towaho teina Yaubada Natuna'.

**40** Tupwadi waiwaihiu amwaha daodaowena hivinuvinunu, neta Meli Magidalaena mayana

waligeha, iya Yosa yo tahina alomauna Yemesa hinadi, yo Salome hinage.

<sup>41</sup> Hiya mwalona Yeisu himulitaei na ana hipapaihowaine yana ta'i'ili Galili ainai, na tupwadi waiwaihiu hinage Galiliyena Yeisu baidanao hihaema Yelusalem ainai, maudoidi hivinuvuinunui.

*Yeisu ana mwau magaiyai*

(*Madiu 27:57-61; Luke 23:50-56; Yoni 19:38-42*)

<sup>42</sup> Bada lavilavi'o na hi'atububuni vali ahubena vehabana, neta Yudeyao yadi Tapwalolo.

<sup>43</sup> Eeta ehebo towaho Alimatiyaena, yehana Yosepa ilaoma, iya ehebo Yudeyaone yadi tau-mugai mayana yemidi, na iha'waha'wa aiteya hauga Yaubada bale'uwai ivetauloina. Yosepawa ilaoma na mayana atepatu iluwu Pailato mehenai, na Yeisu tauna mwalomwalowoina i'awanoiyei yo ebe imwauwi magaiyai.

<sup>44</sup> Pailato i'aluwagavai, iwalo, ‘Ae! Yeisu bada imwalowoi'o?’

<sup>45</sup> Na towahonane iwalo, ‘Oo, bada imwalowoi'o’. Eeta Pailato italam yo Yosepa Yeisu tauna mwalomwalowoina ivavaine.

<sup>46</sup> Na Yosepa ale'o hewahewana igimwalai, na ivai, ta mayana taumulitao Yeisu tauna mwalomwalowoina aiwa lagalagana ainaena hivai'aituluwenama, na ale'onane ainaena hihuhumane, na mulitai abo magai ainai himwamwauwine. Na magainane dova duluva gaima holana yatuyatu nonovaina, na gaima mwala'ina na po'upo'uwana ainaena magai awana himwau'auhine.

<sup>47</sup> Na Meli Magidalaena yo mayana waligeha, iya Yosa hinana, baidana hi'ita'ita sipwaidi,

na magaine ainai tauna mwalomwalowoina himwauwine hi'i'itane.

## 16

*Yeisu yana towolouyo*

*(Madiu 28:1-8; Luke 24:1-12; Yoni 20:1-10)*

<sup>1</sup> Yudeya yadi Tapwalolo ana ahubena i'ovi, ta Meli Magidalaena mayana waligeha, iya Yemesa hinana, yo Salome baidadi woloi namwanamwana higimwalai ta ebe Yeisu tauna hiyweloloi.

<sup>2</sup> Eeta malatomtomwai, neta wiki ana ahubena mugamugaina ainai, na mahana yana hinali taohani ainai, waiwaihiuwone mayadi woloi hiloma Yeisu ana magai ainai.

<sup>3</sup> Na hibom aidiyai hi'au'aubabada, hiwalo, 'Yaiya mata gaimane magai awanaena hive'i wahiyei vehabada?' Wuwuna gaimanane ivitai alili.

<sup>4</sup> Na hi'ita hae magaiwa ana gudu gaimawa bada awanaena hive'i wahiyena'o.

<sup>5</sup> Waiwaihiuwone magaiyai hiluwu, na nimatautuwadiyena hevali ehebo hi'i'itane, ana ale'o hewahewana imiyamiya, ta hi'aluwagavai.

<sup>6</sup> Na hevaliwa aidiyai iwalo, 'Havena am'alu'aluwagavai, Yeisu towaho Nasaleti iya hitutuye patuwa ambehabehaei, iya nigele teinai, wuwuna bada mwalowoiyena itowlouuyo'o, yana aba'eno a'ava teina am'ita.

<sup>7</sup> Na omiu amlau gwaipile yo Yeisu ana tau-mulitao aidiyai amwalo mahalava na hinage Pita ainai amwalo mahalava, amwalo, "Yeisu ilau mugai'o Galili na omiu ammulitaei yo tenem

ainai am'ita. Dova mwalona yana walomahalava alimiyyai.”’

<sup>8</sup> Eeta waiwaihiuwowa magaiyena himahalava mwayamwayau na hidedenane, wuwuna nuwadi ipwanopwano moiha, na hinage hibatubatutuli mayadi meheuhi, na nigele yaiya ainai hiyawalo mahalava.

*Yeisu yana mahalava Meli Magidalaena ainai  
(Madiu 28:9-10; Yoni 20:11-18)*

<sup>9</sup> Wiki ana ahubena mugamugaina malatomtomwai, Yeisu yana towolouyo ainai imahalava mugai Meli Magidalaena ainai, iya ainaena mwalona alu'aluwa yababadi hitau 7 Yeisu ivai vehuludi.

<sup>10</sup> Eeta Meliwa ilau na Yeisu ana taumulitao ivenuwamwauwedi, na hiya howola mayadi nuwayababa hidoudou Yeisu vehabana.

<sup>11</sup> Ta Meli wasa imohedi iwalo, ‘Yeisu mayawahina imiyamiya, bada ya’itaya’o’. Na hiya hi’awa oya’oyamaei.

*Yeisu yana velaulobaloba ana taumulitao bwau  
aidiyai*

*(Luke 24:13-35)*

<sup>12</sup> Mulitai Yeisu ana taumulitao hitau bwau Yelusalemaena himahalava na vali dalava vehabana hilaulau, na Yeisu i’abiye mahalavauyoi vali ita ainaena.

<sup>13</sup> Mulitai hitau bwauwa Yelusalem ainai hiwuyo na adi geluwo hivenuwamwauwedi, na hesi nigele hiyayemidiyedi.

*Yeisu ana taumulitao yadi paihowa imohedi  
(Madiu 28:16-20; Luke 24:36-49; Yoni 20:19-23;  
Paihowa 1:6-8)*

**14** Mulitai Yeisu ana taumulitao hitau 11 hi'ai'ai na Yeisu mehediysi imahalava, na iwalowedi yadi nuwatupatupa vehabana, iwalo, 'Ada geluwo hiya yagu towolouyo tuluhanai hi'itagau na alimiysi hiwalo mahalava'o, na vedova ta nigele amyayemidiyedi?'

**15** Na loina imohedi iwalo, 'Amlau tupwa maudoina aidiyi, wasagu tomowa maudoidi aidiyi amguguyaei.

**16** Ta ebe yaiyadiwo hiyemidiyegau am'abiye bapitaisowedi na livahi hilobai, na ebe yaiyadiwo nigele hiyayemidi howola abo loina yababana hilobai.

**17** Na agu tauyemidiwone ve'ive'ilala wahiwahiyaladi hipaihowaidi, neta yehaguwena alu'aluwa yababadi tomowa aidiyena hiheusili mahalavaedi, na hinage alina vagavagadi aidiyena hi'au'aubabada,

**18** yo ebe weso hi'abihinidi na hiwomalidi, mata nigele hiyamwalowoi, yo ebe bwahi newanewalidi hinuma mata nigele hiyamwalowoi, na ebe tauovalao hi'abisawahidi, hinamwanamwa ta'i.'

### *Yeisu ihae galewai*

(Luke 24:50-53; Paihowa 1:9-11)

**19** Yada Bada Yeisu yana venuwamwau aidiyi bada i'ovi'o ta ihahaene galewai, na Yaubada nima tautuwananai imimiyane.

**20** Na ana taumulitaowa hilau tupwa maudoidi aidiyi na Yeisu wasana higuguyaei, na hesi yadi Bada ta'i baidadi hipaihowa, na yana wahiyalaena paihowao abanuwapwanopwano hipaihowaidi, neta ainaena tomowa wasanane hiyeyemidiyeine.

**YAUBADA YANA WALO YEMIDI VAUVAUNA  
The New Testament in the 'Auhelawa Language of  
Papua New Guinea**

**Nupela Testamen long tokples 'Auhelawa long Niugini**

copyright © 2008 Papua New Guinea Bible Translation Association, Inc.

Language: 'Auhelawa

Translation by: Papua New Guinea Bible Translation Association

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

c4f269ee-bf9d-5438-a164-d22b6816de83